


廿二史攷異
八







廿二史攷異

(八)

錢大昕撰

廿二史考異卷四十五

唐書五

兵志

諸府總曰折衝府。凡天下十道置府六百三十四。皆有名號。而關內二百六十一。今據地理志所載軍府數之。關內道二百七十三。又延州新置府二。河南道六十二。河東道一百四十一。河北道三十。山南道十。隴右道二十九。淮南道六。江南道二。劍南道十。嶺南道三。實止五百六十六。而關內乃有二百七十三。與志頗不相應。而百官志云。三輔及近畿州都督府皆置府。凡六百三十三。則又與兩數俱別。杜氏通典州郡篇云。折衝府五百九十三。職官篇則云五百七十四府。王溥唐會要云。關內置府二百六十一。又置折衝府二百八十。通計舊府六百三十三。陸宣公奏議云。太宗置府八百。在關中者五百。杜牧原十六衛篇云。外開折衝府五百七十有四。王伯厚引鄴侯家傳云。諸道共六百三十府。又引理道要訣云。五百九十三。理道要訣十卷杜佑撰。唐人述府兵之數。言人人殊。宜乎史家莫適從也。

唐初兵之戍邊者。大曰軍。小曰守捉。曰城。曰鎮。而總之者曰道。此所云道者。謂節度也。唐初分天下爲十道。不皆有屯戍之兵。平盧。范陽皆屬河北道。河西。安西。北庭皆屬隴右道。初無道之名。志當云以節

度統之。而後云某節度統某某軍，某某守捉，乃爲得之。

若盧龍軍一、東軍等守捉十一。曰平盧道。案平盧節度統平盧、盧龍二軍及東軍、北口、洪水、鹽城、燕郡、渝關、汝羅、懷遠、巫閭、襄平、安東十一守捉。志不及平盧軍，誤也。

橫海、北平、高陽、經略、安塞、納降、唐興、渤海、懷柔、威武、鎮遠、靜塞、雄武、鎮安、懷遠、保定軍十六。曰范陽道。案舊書地理志：范陽節度使統經略、威武、清夷、靜塞、恆陽、北平、高陽、唐興、橫海等九軍。此云軍十六。而又少清夷、恆陽。與舊志異。竊意鎮安、懷遠、保定三軍在營平二州界內，似不當屬范陽。且志所載皆天寶以前之制。而鎮安軍本燕郡守捉。貞元二年改名。尤不應闕入也。清夷軍垂拱中置。恆陽軍開元中置。則此志轉遺之，皆不若舊史之可據。又地理志：幽州昌平縣有防禦軍。媯州懷戎縣有寧武、廣邊二軍。此志不載。當是肅宗以後增置也。

天兵、大同、天安、橫野軍四。岢嵐等守捉五。曰河東道。案河東道有岢嵐、忻州、代州、雲中、樓煩、清塞六守捉。此云五者，不數清塞也。

朔方經略、豐安、定遠、新昌、天柱、宥州經略、橫塞、天德、天安軍九。三受降、豐寧、保寧、烏延等六城。新泉守捉。一曰關內道。朔方經略，一也。宥州經略，一也。併豐安等爲九軍。地理志：豐州中受降城。西有天安軍。天寶十二載置。此關內之天安軍也。代州西有天安軍。天寶十二載置。此河東之天安軍也。此二軍同。

名又同時置。其地又不相遠。或地理志重出。此又展轉相因耳。舊地理志。新泉軍隸河西節度。而朔方節度管內尙有安北都護及振武軍。

赤水、大斗、白亭、豆盧、墨離、建康、寧寇、玉門、伊吾、天山軍十。烏城等守捉十四。曰河西道。案地理志。涼沙

諸州守捉有烏城、張掖、交城、百帳、豹、文山、蓼泉、酒泉、威遠、羅護、赤亭、獨山、張三城。凡十二名。赤水、白亭、同城三守捉。則開元天寶之際。已改爲軍。赤水即大斗軍。白亭即白亭軍。同城即寧寇軍。此云守捉十四。殊未合也。天山、伊吾

二軍。舊地理志隸北庭節度。

瀚海、清海、靜塞軍三。沙鉢等守捉十。曰北庭道。案地理志。靜塞軍。大厯六年置。此所舉軍名。皆天寶以

前所置。不宜及靜塞也。守捉十。謂沙鉢城、馮洛、耶勒城、俱六城、張堡城、烏宰、葉河、黑水、東林、西林也。

保大軍一。鷹娑都督一。蘭城等守捉八。曰安西道。案地理志。安西都護府有蘭城、次城、葱嶺、于術、榆林、

龍泉、東夷僻、西夷僻、赤岸九守捉。此云守捉八。所未詳也。安西節度統龜茲、焉耆、于闐、疏勒四鎮都督

府。此獨舉鷹娑都督。亦未詳。

鎮西、天成、振威、安人、綏戎、河源、白水、天威、榆林、臨洮、莫門、神策、寧邊、威勝、金天、武寧、曜武、積石軍十八。平

夷、綏和、合川守捉三。曰隴右道。案地理志。無綏戎軍。當是威戎之譌。地理志。鄯州西北三百五十里。

有威戎軍是也。舊地理志。隴右節度所統九軍。亦有威戎。無綏戎。

威戎、安夷、昆明、寧遠、洪源、通化、松當、平戎、天保、威遠軍十。羊灌田等守捉十五。新安等城三十二。犍爲等鎮三十八。曰劍南道。案地理志無安夷軍。惟資州有安定軍。又漢州有威勝軍。彭州有鎮靜軍。遂州有靜戎軍。此志皆不載。又考地理志。劍南道有羊灌、田朋、笮緹橋、彭白沙、彭合江、穀埏、三谷、翼、乾溪、白望、暗桶、赤鼓溪、石梯、達節、鷓口、質臺、駱它、通耳、爪平、乾溪、侏儒、箭上谷口。維乾溪兩見疑有譌澄川、南江、姚二十四守捉。七盤、安遠、龍溪、彭新安、三阜、沙野、蘇祿、保塞、羅山、西瀘、蛇勇、遏戎、壽晏山、邊臨、統塞、集重、伐謀、制勝、龍游、尼陽。雅武侯、廓清、銅山、肅寧、大定、要衝、潘倉、三碉、杖義、瑠璃、和孤、黎峨、和、白岸、都護、祚鼎、翼符、堅維三十六城。犍爲、沐源、寺莊、牛徑、銅山、曲灘、陁和平戎、依名、利雲、溶川、羅護、柘林、大池、雞心、龍溪、賴泥、可陽、婆籠、馬鞍、始犁、峨眉、嘉和川、始陽、靈關、安國。雅定蕃、飛越、和孤、黎隴、東、益登、清溪、禦藩、吉超、翼寧、塞、姜維、維石門、龍騰、和戎、馬湖、移風、伊祿、義賓、可封、泥溪、開邊、平寇戎四十七鎮。與此志數皆不合。

嶺南、安南、桂管、邕管、容管經略、清海軍六。曰嶺南道。嶺南五管各置經略軍。竝清海爲六。

平海軍一、東牟、東萊守捉二、蓬萊鎮一。曰河南道。地理志登州有平海軍。亦曰東牟守捉。此志分爲二。

非也。東萊守捉以萊州刺史領之。東牟守捉以登州刺史領之。天寶以前河南初無節度之名也。

玄宗以萬騎平韋氏。改爲左右龍武軍。皆用唐元功臣子弟。唐元卽唐隆溫王年號也。史避明皇諱改。

崔日用傳云。唐元之際。日用實贊大謀。

郭子儀之壻端王傅吳仲孺。唐會要。仲孺官太子詹事。諡曰襄。

昭宗伐李茂貞。乃用嗣覃王允爲京西招討使。神策諸都指揮使李鐵副之。案昭宗紀。景福二年。嗣覃王嗣周爲京西面招討使。神策大將軍李鐵副之。以討李茂貞。宦者傳。以嗣覃王戒丕爲京西招討使。嗣覃王之名。三處互異。今考本紀。乾寧四年八月。韓建殺嗣覃王嗣周。嗣延王戒丕。嗣丹王允。而十一宗諸子及沙陀傳俱有嗣延王戒丕。嗣丹王允之文。則嗣覃王之名。當從本紀。

食貨志一

凡授田者。丁歲輸粟二斛。稻三斛。謂之租。丁隨鄉所出。歲輸絹二匹。綾絕二丈。布加五之一。縣三兩。麻三斤。非蠶鄉。則輸銀十四兩。謂之調。盧學士召弓曰。此志約舊志及通典之文。殊未明晰。蓋歲輸粟二斛。謂之租。稻卽粟也。粟二斛之外。何以又加稻三斛乎。丁隨鄉所出。或出絹絕二丈。或不出絹絕。而出布加五之一。則二丈四尺也。時實徵二丈五尺。輸絹絕者。兼調縣三兩。輸布者。麻三斤。非蠶鄉者。則出布矣。亦無輸銀之理。又考唐律疏義引賦役令。每丁租二石。調絕絹二丈。縣三兩。布二丈五尺。麻三斤。又唐六典戶部下云。課戶每丁租粟二石。其調隨鄉土所產。綾絹絕各二丈。布加五分之一。輸綾絹絕者。縣三兩。輸布者。麻三斤。關內道京兆同。華岐四州調。縣絹餘州布麻。河南道陳許汝潁調。以絕。縣唐州麻布。

餘竝以絹及緜。可見綾絹絕三者不竝徵也。皆無稻三斛。銀十四兩之文。新志妄增之。其流毒恐有不可言者。唐時唯蠻州用銀。中國未以此爲市易。何由徵之。通典載土貢。惟海南諸郡貢銀。大率二十兩。間有三十兩。五十兩者。獨始安郡百兩。夫一郡二十兩。一丁乃當其三分之二。有是事乎。歐宋諸公。不應荒唐至此。得無鈔胥之妄增邪。

食貨志三

唐開軍府。以扞要衝。因隙地置營田。天下屯總九百九十二。司農寺每屯三頃。州鎮諸軍每屯五十頃。

盧學士召弓曰。案通典。開元今諸屯。隸司農寺者。每三十頃以下。二十頃以上。爲一屯。今云每屯三頃。以三頃之少。而設屯官。屯副以主之。不太煩乎。大昕案。三下當脫十字。

上地五十畝。瘠地二十畝。稻田八十畝。則給牛一。盧學士召弓曰。此又誤也。通典云。土軟處。每一頃五十畝。配牛一頭。強硬處。一頃二十畝。配牛一頭。其稻田給牛之數。則與志同。今以土軟土硬。改爲上地瘠地。未盡失也。而兩句皆脫去一頃二字。則於牛力甚有餘。而以一牛博瘠地二十畝之所入。何以相當乎。

刑法志

凡斷屠日。及正月、五月、九月。不行刑。斷屠日。謂每月一日、八日、十四日、十五日、十八日、二十三日、二十

四日、二十八日、二十九日、三十日也。

帝以問大理卿劉德威對曰律失入減三等失出減五等今失入無辜而失出爲大罪故吏皆深文此
事又見德威傳

開元三年黃門監盧懷慎等又著開元格至二十五年中書令李林甫又著新格凡所損益數千條明年
吏部尚書宋璟又著後格皆以開元名書案藝文志開元後格十卷宋璟等刪定以開元七上年開
元新格十卷李林甫等刪定以開元二十五年上是宋璟著後格在林甫之前矣又據璟傳璟以開元
二十五年卒卽林甫進新格之歲也安得於明年更預撰述乎此敍次偵倒之甚者

左臺御史周矩上疏曰比姦愴告訐習以爲常推劾之吏以深刻爲功鑿空爭能相矜以虐泥耳囊頭摺
脅籤爪懸髮燻耳臥鄰穢溺刻害支體糜爛獄中號曰獄持閉絕食飲晝夜使不得眠號曰宿囚殘賊
威暴取快目前被誣者苟求得死何所不至爲國者以仁爲宗以刑爲助周用仁而昌秦用刑而亡願
陛下緩刑用仁天下幸甚武后不納此疏又見酷吏傳此云左臺御史而彼云右臺官名小異此云
后不納而彼云后寤獄乃稍息何其相刺謬也

藝文志一

易類 何安講疏十三卷 安當作妥南監本不誤

樂類。釋智匠古今樂錄十三卷。舊志作智邱。

小學類。蔡邕今字石經論語二卷。一類之中前後重見。

藝文志二

正史類。李喜漢書辨惑三十卷。舊志作李善。善與喜字形相涉。下文又有李善漢書辨惑二十卷。恐

卽一書而重出也。

謝吳姚察梁書三十四卷。

吳、隋志作吳。姚思廉傳作吳。編年類有又謝吳梁皇帝實錄五卷。雜家類有謝吳物始十卷。

章懷太子賢注後漢書一百卷。注云。賢命劉訥言。格希玄等注。注書諸人名已見章懷本傳。此重出而

文又不備。

司馬貞史記索隱三十卷。注云。開元潤州別駕。案。劉知幾傳有博士司馬貞。

僞史類。劉昫燉煌實錄二十卷。此書又見雜傳記類。

武敏之三十國春秋一百卷。卽賀蘭敏之也。

雜史類。王粲漢書英雄記十卷。漢書當作漢末。

虞溥一作博誤江表傳五卷。又見雜傳記類作三卷。

郭頒魏晉代說十卷。代卽世字。篇中如帝王代紀之類。皆避諱改。而劉義慶世說。劉孝標續世說。仍不避。

劉涓先聖本紀十卷。涓當作緡。見南史。

南卓唐朝綱領圖一卷。注云。字昭嗣。大中黔南觀察使。上卷樂類有南卓羯鼓錄。注當在彼。

起居注類。晉崇寧起居注十卷。舊志亦作崇寧。晉時無此年號。故讀者疑之。予謂崇寧當爲崇安。卽

隆安也。唐人避明皇諱。往往改隆爲崇。以晉史考之。隆安紀元。正在太元之後。元興之前。此卷又有晉

崇安元興大享副詔八卷。足明崇寧當爲崇安矣。雜史類有周祇崇安記二卷。王韶之崇安記十卷。亦

紀晉安帝事也。此文有晉隆和興寧起居注五卷。仍書隆字。所謂史駁文。

文宗實錄四十卷。注云。盧告字子有。弘宣子也。歷吏部侍郎。案。弘宣傳已有之。但此云吏部侍郎。而傳

云終給事中。爲異爾。

故事類。葛洪西京雜記二卷。又見地理類。

雜傳記類。圈稱陳留風俗傳三卷。又見地理類。

章懷太子列藩正論三十卷。儒家類。列藩正論三十卷。列于武后所撰諸書之末。章懷太子所撰之前。

蓋重出而又舛誤也。舊志儒家類無此書。

唐臨冥報記二卷。又見小說類。

劉餗國朝傳記三卷。小說家類有劉餗傳記三卷。一作國史異纂疑卽一書。

儀注類。韋公肅禮閣新儀二十卷。注云。元和人。公肅官名時代。已見本傳及禮樂志。此注重出也。

王涇大唐郊祀錄十卷。注云。貞元九年。上時爲太常禮院修撰。此注重出。已見禮樂志。凡注文重出。吳氏所糾者。不更

及。

袁郊二儀實錄。衣服名義圖一卷。注云。字之儀。滋子也。昭宗翰林學士。郊官位已見袁滋傳。又宰相世

系表。郊字之乾。虢州刺史。與此注互異。

刑法類。開元後格十卷。注云。吏部侍郎兼侍中宋璟。侍郎當作尙書。

目錄類。羣書四錄二百卷。注云。殷踐猷。王愜。韋述。余欽。母暝。劉彥直。王灣。王仲邱撰。元行沖上之。此

事已見元行沖傳。

譜牒類。賈執百家譜。又姓氏英賢譜一百卷。案。柳沖傳。晉太元中。散騎常侍賈弼撰姓氏簿狀。十八

州百十六郡。合七百一十二篇。傳子匪之。匪之傳子希鏡。希鏡撰姓氏要狀十五篇。希鏡傳子執。執更

作姓氏英賢譜一百卷。又著百家譜。執傳其孫冠。冠撰梁國親皇太子序親簿四卷。是賈氏世系先後

分明。志列賈冠所撰於前。或緣帝王族親。以類相從。不拘子孫之次。若希鏡所撰。列於執書之後。則失

之不考矣。

大唐氏族志一百卷。注云。高士廉。韋挺。岑文本。令狐德棻撰。又姓氏譜二百卷。注云。許敬宗。李義府。孔志約。楊仁卿。史玄道。呂才撰。此兩書撰人名。已見高士廉。李義府二傳。此注重出。但云某人等撰可矣。地理志。括地志五百五十卷。注云。魏王泰命著作郎蕭德言。祕書郎顧胤。記室參軍蔣亞卿。功曹參軍謝偃。蘇勛撰。此事已見漢王泰傳。而注復重出。傳惟少蘇勛一人。

藝文志三

儒家類。章懷太子春秋要錄十卷。秋當作宮。

張太玄平臺百一寓言三卷。太玄。舊志作太素。

楊倞注荀子二十卷。注云。汝士子。大理評事。案。宰相世系表。汝士子有知溫。知遠。知止。汝士傳三人。無名倞者。

元和辨謗略十卷。注云。令狐楚。沈傳師。杜元穎撰。此事已見唐次傳。

儲光義正論十卷。注云。兗州人。案。別集類云。包融與儲光義皆延陵人。里居互異。

道家類。張志和玄真子十二卷。案。神仙門又有志和玄真子二卷。疑卽一書。

鄭雲千清虛真人裴君內傳一卷。雲千。舊志作子雲。

玄應大唐衆經音義二十五卷。今釋藏本題云一切經音義。宋藝文志亦作一切經音義。

農家類。賈思協齊民要術十卷。案下文有李淳風續齊民要術。此民字亦當爲人。疑校書者所改也。

五行類。又有李淳風四民福祿論。道家類有劉遺民玄譜。

小說家類。劉齊釋俗語八卷。齊當作霽。

醫術類。李氏本草二卷。案于志寧傳云別錄者。魏晉以來。吳普、李當之所記。弘景合而錄之。此李氏

卽李當也。

孟詵必効方十卷。舊史詵傳云三卷。

司空輿發焰錄一卷。注云圖父。大中時商州刺史。案司空圖傳父輿。官戶部郎中。不云爲商州刺史。

藝文志四

別集類。王澣集十卷。卽文藝傳之王翰也。舊史文苑傳亦作澣。

竇叔向集七卷。注云字遺直。與常袞善。袞爲相。用爲左拾遺。內供奉。及貶。亦出溧水令。案竇羣傳云。父

叔向。以詩自名。代宗時。位左拾遺。若以此注云云。改入本傳。則文省而無重出之累矣。

包融詩一卷。注云江寧有右拾遺孫處玄。舊史隱逸傳有孫處玄。新史刪去。卽此人也。此云江寧。而彼

云潤州者。江寧時隸潤州也。

張文成龍筋鳳髓十卷。文成、驚之字也。字而不名。非例。

總集類。司馬相如上林賦一卷。上林賦以下八部。不當入總集。

褚令之百賦音一卷。令當作詮。

元思敬詩人秀句二卷。文史門又有元兢古今詩人秀句二卷。疑卽一書。思敬見舊史文苑傳。

廿二史考異卷四十六

唐書六

宰相表上

武德元年六月。將作大匠。襲陳國公竇抗本官兼納言。黃門侍郎陳叔達判納言。兼判皆未正授之稱。

考。叔達以是年判納言。明年乃兼納言。則判又在兼之下也。

四年十月。世民加司徒天策上將。案。武德元年。世民已爲太尉。太尉在司徒之上。此云加司徒者。以太

尉兼領司徒也。九年二月。元吉爲司徒。則世民但爲太尉。不兼司徒矣。

貞觀六年三月。君集以喪罷。十一月。君集起復。案。唐時宰相居喪。無不奪情起復者。然君集起復。相距

猶八月。若八年長孫无忌起復。十七年房玄齡起復。咸亨元年李敬元起復。乾元二年呂諲起復。天復

二年韋貽範起復。則相距三月。貞觀二十二年褚遂良起復。相距四月。大約百日卒哭之後。卽有詔起

復也。龍朔三年七月戊戌。李義府以母喪罷。九月丁丑。卽起復。止隔四十日。未免太促。或其中有閏月

則亦百日矣。

永淳元年十月。黃門侍郎劉景先同中書門下平章事。案。高宗武后紀俱作劉齊賢。宰相世系表云。齊

賢更名景先。蓋高宗時避章懷太子諱改名。而齊賢本傳不書。此史之漏也。紀書初名。表書改名。於例殊未盡一。

萬歲登封元年乙未。案是歲一月改元證聖。九月改元天冊萬歲。其明年臘月改元萬歲登封。三月改元萬歲通天。史家之例年號以後改者爲定。此乙未歲當書天冊萬歲元年。表云萬歲登封誤。

宰相表中

天寶十一載十一月林甫死。春秋之法內諸侯稱薨。內大夫稱卒。外諸侯亦稱卒。雖宋文公魯桓公。仲遂。季孫意如之倫。書薨卒無異辭。所謂直書而善惡自見也。歐公修唐書於本紀亦循舊史之例。如李林甫書薨。田承嗣。李正己書卒。初無異辭。獨於宰相表變文。有書薨。書卒。書死之別。欲以示善善惡惡之旨。然科條既殊。爭端斯啓。書死者固爲巨姦。書薨者不皆忠讜。予奪之際。已無定論。紫陽綱目頗取歐公之法。而設例益繁。或去其官。或削其爵。或奪其諡。書法偶有不齊。後人復以己意揣之。而讀史之家。幾同於刑部之決獄矣。

宰相表下

開成四年五月。陳夷行罷爲吏部侍郎。本傳作吏部尙書。

大中十三年十二月。敏中守司徒。兼門下侍郎。同中書門下平章事。凡前宰相再入。例書姓。如蕭瑀。高

士廉、姚元之、唐休璟諸人是也。白敏中自荆南節度使再入相，不書姓。此史文之闕。舊唐書懿宗紀不載敏中入相事。

廣明元年二月，從讜檢校司空、兼平章事、河東節度行營招討等使。鄭從讜傳作檢校司徒，誤也。舊唐書本紀亦作司空。

乾寧二年三月，戶部侍郎、判戶部王搏爲中書侍郎、同中書門下平章事。案舊書本紀，搏拜相在景福二年十二月。乾寧元年十月，出爲湖南節度使。二年六月，復爲中書侍郎、平章事。新史祇有此年入相事，不云罷而復相。又舊史稱六月復相，而此書於三月皆不相合。蓋宣宗以後，實錄散亡，傳聞互異。新舊兩史之抵牾者，難以更僕數矣。

方鎮表一

開元九年，置朔方軍節度使，領單于大都護府、夏鹽綏銀豐勝六州，定遠豐安二軍、東中西三受降城。唐會要：開元元年十月，敕朔方行軍大總管，宜準諸道例，改爲朔方節度使。其定遠豐安軍、東西中城、單于、豐勝、靈夏、鹽銀、匡長、安樂等州，竝受節度。此表云九年，其所領州亦互異。未審孰是也。地理志：靈州有朔方軍，黃河外有豐安、安遠、新昌等軍。安遠當爲定遠之譌。朔方軍置於靈州，則靈州必在所領之內，恐表有脫文。

二十二年以安樂二州隸原州。此州以安樂爲名，非兩州也。二字衍。

至德元載置京畿節度，領京兆、同岐、金、商五州。案天寶元年以前，乾元元年以前，稱郡不稱州。當云京

兆、馮翊、鳳翔、安康、上洛五郡，餘仿此。

是年以金、商、岐州隸興平。案第七卷云，興平節度使領上洛、安康、武當、房陵四郡，則岐州不在興平管

內，此文疑誤也。

別置關內節度使，以代採訪使，徙治安化郡。以呂崇賁爲使，未幾改命王思禮。安化時已改名順化矣。

乾元二年置陝虢華節度，領潼關防禦團練鎮守等使。是時安慶緒再陷東京，以關陝要地，除來瑱爲

節度使鎮之。其明年瑱移鎮山南，除郭英乂陝西節度、潼關防禦等使，尋兼神策軍節度使。其後英乂

入朝，而神策隸於觀軍容部下，遂爲禁軍，非州郡兵矣。

上元二年以華州置鎮國節度，亦曰關東節度。廣德元年罷鎮國軍節度。案舊史本紀，廣德元年有同

華節度使李懷讓，懷讓死而周智光繼之。至大曆二年，智光伏誅，始不除節度。表云廣德元年罷節度

者，非也。同州本隸河中，上元二年改隸鎮國軍。此表不云領同州，亦漏也。

大曆五年，涇原節度使馬璘訴地貧，軍廩不給，遙領鄭、穎二州。依前後文例，但當云涇原節度遙領鄭

、穎二州。且璘傳已云涇軍乏財，帝諷李抱玉讓鄭、穎，則此文尤可省也。抱玉時以澤潞帥權鳳翔、隴右

節度使兼領兩鎮。而璘亦權知鳳翔隴右節度副使。故得分其地以益涇原也。及段秀實代璘。忤宰相楊炎。因奪其潁州。秀實既受代去。竝鄭州亦罷之。此事理之想當然者。

十四年。析置河中。振武。邠寧三節度。是時德宗初立。罷郭子儀副元帥。以李懷光爲河中尹。邠寧慶管絳慈隰等州節度觀察使。以常謙光兼靈州大都督。西受降城定遠軍天德鹽夏豐節度等使。渾瑊爲單于大都護。振武東中二受降城鎮北及綏銀麟勝等軍州節度營田使。蓋於朔方管內。析置邠寧。振武二節度。河中卽在邠寧管內。并朔方爲三鎮也。是歲十一月。又除杜亞爲河中尹。晉絳慈隰都防禦觀察使。則河中別爲一鎮矣。乃第六卷河中篇不云是年置都防禦使。與此文不相應。

建中二年。置河陽三城節度使。以東都畿觀察使兼之。領懷。鄭。汝。陝。四州。尋置使。增領東畿五縣及衛州。亦曰懷衛節度使。案舊本紀。是年正月。以路嗣恭爲鄭。汝。陝。河。陽。三城節度使。東畿觀察使。卽表所云置河陽三城節度。以東都畿觀察使兼之也。其五月。以李芄爲河陽三城懷州節度使。仍割東畿五縣隸焉。於是河陽別爲節鎮。不領於都畿。而鄭。汝亦不在所管之內。上文云以汝州隸河陽。尋復舊。正指此事。東畿五縣謂河陽。河清。濟源。溫。汜水也。其兼領衛州。則紀傳所未及。衛州本在田悅管內。時李芄受詔討悅。遙假以名。非能有其地也。

四年。置京畿渭南節度觀察使。領金商二州。是年兼渭北鄜坊丹延綏五州。未幾罷五州及金州爲京畿。

商州節度使。今案通鑑是歲十月德宗幸奉天以渾瑊爲行在都虞侯京畿渭北節度使以李昌巖爲京畿渭南節度使尋加城京畿渭南北金商節度使表所云兼渭北鄜坊等五州者卽指渾瑊而言其實瑊以渭北帥兼渭南非渭南兼渭北也興元元年三月始以尙可孤爲神策京畿渭南商州節度使則京畿商州之別置帥乃在次年表併書於一年非也

以隴州置奉義軍節度使尋廢奉義軍以韋皋爲帥次年皋召還此軍遂廢

復置渭北節度如上元之舊尋罷未幾復置徙治鄜州其後置都團練觀察防禦使渭北帥領鄜坊丹

延四州此上元舊制也是歲渾瑊除京畿渭北節度使而又有鄜坊節度使李建徽通鑑亦稱渭北節度將兵入

援殆瑊所將者行營之兵而建徽乃其本帥乎興元元年建徽軍爲李懷光所奪而以李晟兼渭北鄜

坊丹延節度觀察使其年又除唐朝臣鄜坊丹延節度使至貞元二年朝臣移鎮振武乃除論惟明爲

鄜坊都防禦觀察使其明年惟明卒仍書鄜坊節度使則是鄜坊初無罷而復置之事也

興元元年以同州爲奉誠軍節度領同晉慈隰四州是年罷奉誠軍以康日知爲帥

以華州置潼關節度使駱元光爲鎮國軍節度使通鑑在前年十一月至貞元九年元光卒而華州不

除節鎮

貞元元年置陝虢都防禦使治陝州踰月又爲都防禦觀察陸運使是歲陝虢節度使張勸爲其下所

殺以李泌爲陝虢都防禦水陸運使尋加觀察使不除節度而除防禦故云罷陝西節度使置陝虢都防禦使也表書廢陝西節度於上年似誤分爲兩事

罷河陽節度使置都團練使時河陽帥李芑卒因不置節鎮

二年升東都畿汝州都防禦使爲都防禦觀察使案舊本紀貞元元年以賈耽兼東都留守都畿汝州防禦使二年加東都留守賈耽東都畿唐汝鄧都防禦觀察使蓋耽本以留守兼防禦止領汝州至是始進爲都防禦增領唐鄧二州也表於上年已書都防禦增領唐鄧似不如舊紀之得其實矣是歲耽移鎮義成其明年除嗣曹王皋爲山南東道節度使乃割唐鄧隸之

三年罷保義節度置都團練觀察防禦使興元元年李晟爲鳳翔隴右節度使至是罷晟兵柄以其都虞候刑君牙爲鳳翔尹本府團練使君牙資望尙輕故未授以旄節然傳云俄嶺節度表亦云未幾復置節度則君牙建節殆卽在此年乎

德宗置行秦州以刺史兼隴右經略使治普潤以鳳翔節度使領隴右支度營田觀察使案貞元三年吐蕃陷隴右四年以潼關節度使李元諒即駱元光也兼隴右節度使臨洮軍使治良原良原涇州縣也九年元諒卒於良原十年乃以劉潼爲秦州刺史隴右經略軍使理普閭縣卽表所云行秦州也地理志普潤縣有隴右軍貞元十年置十一年以縣隸隴右經略使獨不云置行秦州亦史文之漏也表不書

於貞元十年而附見此年亦未核。

置夏州節度觀察處。置押蕃落使。領綏鹽二州。案舊本紀是年七月以韓潭爲夏州刺史。夏綏銀等州節度使。此表亦有銀夏節度之名。惟此條失書銀州。

六年。涇原節度領四鎮北庭行軍節度使。案自馬璘移鎮涇原以來。涇帥常兼四鎮北庭行營節度。表皆不書。至是安西北庭皆沒於吐蕃。故特書之。其時節度使則劉昌也。

十二年。以天德軍置都團練防禦使。領豐會二州。三受降城。豐州別置都防禦。以李景略爲使。復置河陽懷節度。治河陽。案是年河陽除帥。不見於舊本紀。惟十五年三月書以河陽三城節度使李

元爲昭義軍節度使。疑元除節度卽於十二年矣。

元和元年。升隴右經略使爲保義軍節度。是年劉潼由經略使進節度。其明年潼卒而罷節鎮也。

析丹州置防禦使。案舊本紀元和七年以元義方爲鄜坊丹延觀察使。是丹州析置防禦未久。仍隸鄜坊。而表失書也。又考元和三年以前鄜坊帥皆稱節度。七年以後元義方。薛仵。裴武。李銛相繼爲觀察。至十二年韓公武復除鄜坊丹延節度。其罷而復置。宜見於表史。皆闕而不書。

九年。河陽節度增領汝州。徙治汝州。時憲宗將用兵淮西。以河陽節度烏重胤兼汝州刺史。徙治焉。十二年。淮西平。十三年。除鄭綱東都留守。都畿汝防禦使。則汝仍隸東畿。而重胤還治河陽矣。

十三年。罷河陽節度。今案。舊本紀。元和十三年。重胤移鎮滄州。以令狐楚代之。十四年。楚入相。而魏義通代之。十五年。以田布爲河陽節度。長慶元年。布移鎮。而郭釗代之。二年。釗移鎮。而陳楚代之。三年。楚入爲龍武統軍。史不見交代姓名。以紀傳參考。當是崔弘禮代之。寶曆二年。楊元卿爲節度。太和五年。元卿移鎮。而溫造代之。八年。蕭洪爲節度。開成二年。河陽軍亂。逐其節度使李泳。以李執方代之。會昌三年。則王茂元爲節度。此二十五年之中。河陽凡更十二帥。初未聞罷而更置也。表於是年書罷河陽節度。直至會昌三年復置。殊爲疏舛。且與文宗紀河陽軍亂。逐節度之文。亦不相應。

長慶元年。東都畿防禦領汝州。二年。東都畿復領汝州。案。長慶元年。李絳代鄭綱判東都尙書省事。東都留守。都畿防禦使。結銜內不帶汝州。次年。裴度代絳留守東京。乃復帶之。

大和三年。以陝虢地近京師。罷陝虢都防禦使。案。舊本紀。大和五年八月。以崔咸爲陝州防禦使。詔陝州舊有都防禦觀察使額宜停。兵馬屬本州防禦使。表書於三年。誤也。嗣後李絳。舒元與皆止稱陝州防禦使。至開成元年。復除鄭肅爲陝虢都防禦觀察使。

會昌三年。復置河陽節度。徙治孟州。河陽節度本治懷州。是年。始於河陽置孟州。爲節度治所。表云復置者。誤。

大中三年。邠寧節度以南山平夏部落叛。徙治寧州。及內附。復徙故治。據通鑑。邠寧還故治。在大中九

年。

咸通五年秦州隸天雄軍節度。此天雄軍置於秦州。非魏博之天雄軍。

中和二年渭北節度賜號保大軍節度。增領翟州。地理志坊州郿城縣。唐末置翟州。渭北卽郿坊也。是歲郿坊節度使李孝昌與夏州節度使拓拔思恭同盟起兵討黃巢。故賜其軍號曰保大軍。夏州曰定難軍。

以延州置保塞軍節度。通鑑中和三年五月建延州爲保塞軍。以保大行軍司馬延州刺史李孝恭爲節度使。表書于二年。未知孰是。

三年升陝虢防禦觀察使爲節度使。以王重盈爲帥。

光啓元年邠寧節度賜號靜難軍節度。通鑑在中和四年。其時朱玫爲節度使。

三年升東畿觀察兼防遏使爲佑國軍節度。時張全義爲河南尹。置佑國軍節度。令全義兼領之。通鑑在文德元年。

龍紀元年賜陝虢節度爲保義軍節度。光啓三年王重榮爲其下所殺。重盈移鎮河中。以其子珙領陝

虢帥。

乾寧元年涇原節度賜號彰義軍節度。案通鑑在大順二年。蓋據昭宗實錄。故與表異也。先是大曆七

年涇原節度使劉昌築胡谷堡改名彰義堡彰義之名蓋出於此時張鈞爲節度使鈞卒兄鐔代之鐔卒子璉代之又有珂代璉爲留後其後爲李茂貞所併

二年升同州爲匡國軍節度通鑑於乾寧元年十二月已書匡國節度使王行約行約行瑜之弟也光化元年以華州置鎮國軍節度領同華二州兼興德尹今案通鑑大順元年張濬用兵河東時韓建已爲鎮國軍節度使非於此時始置節度也其兼領同州節度亦在乾寧四年惟興德尹之稱則於是年始授蓋改州爲府因進刺史爲尹耳

更保塞軍節度曰寧塞軍節度案通鑑乾寧四年正月以李思諫爲寧塞節度使在光化紀元之前三年罷鎮國軍節度及興德尹案天復元年朱全忠始克華州舊本紀天祐三年敕華州鎮國節度觀察處置等使額及興德府名竝宜停廢復爲華州刺史仍隸同州爲支郡表書於光化三年誤之甚矣置佑國軍節度案佑國軍置於光啓三年不應更云置當爲罷字之譌蓋天祐元年昭宗遷洛河南尹不帶留守因移佑國軍於長安而張全義亦改除天平節度使此罷佑國節度事或在天復三年而表誤係之光化三年耳

天祐元年以京畿置佑國軍節度使領金商二州案舊本紀天祐三年敕西都佑國軍作鎮已來未有屬郡其金州商州宜隸爲屬郡蓋置鎮在元年其領金商二州則在三年也

三年置義勝軍節度使領耀鼎二州。耀州本京兆之華原縣。鼎州本京兆之美原縣。皆李茂貞所置。并於耀州置節鎮。以李彥韜爲使。卽溫韜也。

廿二史考異卷四十七

唐書七

方鎮表二

景雲二年北都長史領持節和戎大武等諸軍州節度使。案開元十一年始以太原爲北都都置留守都督府。乃有長史。此文當云并州大都督府長史。或省文作并州長史不當云北都長史也。大武軍後改大同軍。開元五年領天兵軍大使。時并州長史張嘉貞言突厥九姓新內屬雜處太原北請置天兵軍綏護其衆。詔以嘉貞領天兵使。八年嘉貞入相除張說并州長史。天兵軍節度大使代之。

十八年更太原府以北諸軍州節度爲河東節度。漢之河東郡在今平陽府。後魏周隋之河東郡卽蒲州。自唐設節鎮而太原遂兼河東之名。其後升蒲州爲河中府分爲兩鎮。而河東縣猶爲蒲州治所。唐會要開元十八年十二月宋之悌除河東節度使。已後遂爲定額。

至德元載置河南節度使。是歲始以嗣吳王祇爲陳留太守。河南道節度采訪使未幾以嗣虢王巨代祇未幾又以賀蘭進明代巨節度。次年以宰相張鎰領河南節度采訪使代進明。乾元元年鎰左遷以崔光遠代之。其冬光遠爲魏州刺史城陷出奔表云乾元元年廢河南節度當在光遠改官之後也。

置淮南西道節度使。以來瑱爲之。

置青密節度使。青州時爲北海郡。當云北海節度使。史據後改稱之。鄧景山傳。至德初。擢拜青齊節度使。卽表所稱青密節度也。

置鄆齊兗三州防禦使。治齊州。此與河南淮西諸節度同時置。而彼稱郡名。此稱州名。體例殊不畫一。

考舊本紀。乾元元年九月。以能元皓爲齊州刺史。齊兗鄆等州防禦使。凡節度防禦團練使帶刺史卽是所治之州。疑表書

此事。本在乾元元年。時已改郡爲州。故不稱郡而稱州。傳刻之譌。溷入前兩格耳。

乾元元年。淮南西道徙治鄭州。是時魯炆以襄鄧節度兼領淮西。而鄭州別置節度。以季廣琛爲帥。史所稱鄭蔡節度也。

別置豫汝許節度使。治豫州。案舊本紀。乾元二年四月。以興平軍節度李奐兼豫許汝等州節度使。此與廢淮西節度蓋一時事。表書於元年。疑誤。

青密節度增領滑濮二州。以許叔冀爲節度使。

二年。置汴滑節度使。治滑州。領州五。滑、濮、汴、曹、宋。又置河南節度使。治徐州。領州五。徐、泗、海、亳、穎。是歲

三月。以滑州刺史許叔冀充滑汴曹宋等州節度使。蓋滑汴與青密分爲二也。又以鄆州刺史尙衡爲

徐州刺史。充亳穎等州節度使。卽表所稱河南節度也。

置鄭陳節度使領鄭陳毫穎四州治鄭州尋增領申光壽三州未幾以三州隸淮西是歲四月以魯炆爲鄭陳穎毫節度使炆本領襄鄧淮西二鎮今解襄鄧祇領鄭陳四州節度蓋以相州師潰之故表所稱置鄭陳節度也六月以彭元曜爲鄭州刺史充陳鄭申光壽等州節度使蓋炆死而元曜代之表所謂增領三州也其九月以王仲昇充申安沔等州節度使表所謂復置淮南西道節度以三州還隸淮西是也

青密節度使增領淄沂海三州是歲四月以徐州刺史尙衡爲青州刺史充清淄密登萊沂海等州節度使卽表所云增領三州也

升鄆齊兗三州都防禦使爲節度使能元皓自都防禦升節度使治兗州故史稱兗鄆節度

上元二年置滑衛節度使治滑州乾元二年滑汴節度使許叔冀降賊至是令狐彰以滑州歸朝因授滑衛相魏德貝六州節度

淮南西道節度使增領陳鄭穎毫汴曹宋徐泗九州徙治安州號淮西十六州節度使今案寶應元年

淮西帥王仲昇爲賊所虜乃除來瑱淮西河南十六州節度使

來瑱傳云十五州無毫徐壽而有豫許

而以裴莪代瑱鎮

襄陽旣而瑱竟不行則河南淮西必別置帥故表又有寶應元年復置河南節度之文其實祇一年中事耳據肅宗紀王仲昇與史朝義將謝欽讓戰於申州敗績在寶應元年建卯月而來瑱移鎮淮西之

命乃在仲昇敗沒以後。則此表以廢河南節度、乃淮西增領十六州事屬之上元二年者。其誤顯然矣。置淄沂節度使。案舊本紀。殷仲卿爲淄州刺史。淄沂滄德棣等州節度使。在上元元年十月。

平盧軍節度使侯希逸引兵保青州。授青密節度使。據通鑑。在寶應元年。平盧軍本置於營州。至是移

駐青州。而淄青節度遂兼平盧之號。猶鳳翔兼隴右。涇原兼四鎮北庭行營也。

寶應元年。復置河南節度使。治汴州。以田神功爲節度使。

淮西節度增領許隨唐三州。是歲七月。以李忠臣爲淮西十一州節度。尋加安州刺史。

以鄭州隸澤潞節度。乾元二年九月。李抱玉爲鄭陳潁亳節度使。至是。除澤潞節度。仍以鄭隸之。

中州隸蔡汝節度。蔡州卽豫州。是年代宗卽位。避諱改名。節度使則李忠臣也。

是年。廢兗鄆節度。本以田神功代能元皓爲兗鄆帥。神功移鎮汴州。因以兗鄆所領。分隸神功與侯希

逸也。

廣德元年。析相貝別置節度。魏博別置防禦。相貝魏博諸州爲賊所據。雖領於令狐彰。實不能有其地。

至是。薛嵩。田承嗣始以州歸朝。因授以節鎮也。滄德亦侯希逸遙領。至是始隸魏博。

永泰元年。淄青平盧節度增領押新羅北海兩番使。北海當作渤海。

大曆十一年。廢河南節度使。是歲。汴宋留後田神玉卒。其將李靈耀拒命。詔諸道兵討之。李正己取曹

竟鄆濮徐五州。李忠臣取汴州。卽以其地益之。李勉本兼汴宋節度。所得惟宋泗二州耳。

淮西節度增領汴州。徙治汴州。李忠臣徙治汴。蓋欲伺隙兼取汴宋故地。

十四年。淮西節度使復治蔡州。更號申光蔡節度使。汴州隸永平軍節度。是歲。李希烈逐忠臣。卽以三州與之。仍以汴還永平軍。令李勉移治之。

建中二年。置宋亳穎節度使。治宋州。時永平將劉洽有功。析三州除節鎮。

三年。廢淄青平盧節度使。是時李納拒命。下詔討之。故析其地爲三鎮。徐海沂密四州亦在淄青管內也。興元元年。納歸命。仍復其舊。

興元元年。宣武軍節度使徙治汴州。時劉洽破李希烈。取汴州。卽以其地與之。

賜河東節度號保寧軍節度。時馬燧爲節度使。賜軍號以寵之。貞元三年。燧罷兵柄。因去軍額。

貞元四年。置徐泗濠三州節度使。徐州本在淄青管內。李洧始以州歸國。至是因李泌言。於徐州置鎮。

以張建封爲節度使。濠當作豪。地理志。濠州字初作豪。元和三年。改從濠。建封除帥。在元和以前。其時未加水旁。韓退之有徐泗濠三州節度掌書記廳壁記。退之在建封幕中所作也。建封傳亦作濠。史家

失於考正耳。

十六年。廢徐泗濠三州節度使。未幾。復置泗濠二州觀察使。隸淮南。徐州領本州留後。是歲。張建封卒。

軍中請立其子悛爲留後。德宗不許。命將討之。故廢節度。而以濠泗隸淮南。旣而師出無功。乃除悛刺史。知留後事。而濠泗別立觀察也。

元和二年。廢泗濠二州觀察使。置武寧軍節度使。治徐州。領徐泗濠三州。是歲。張悛以疾求代。除王紹

節度武寧。復領濠泗二州。據表。似武寧之號。在兼領三州之日。而悛傳云。進悛武寧軍節度使。是又不

始於王紹也。舊書順宗紀。永貞元年。徐州節度賜名武寧軍。

十一年。彰義軍增領唐隨鄧三州。尋以三州別置節度使。時唐隨鄧節度高霞寓討吳元濟。兵敗。乃以袁滋爲彰義軍節度使。申光唐蔡隨鄧州觀察使。故云彰義軍兼領三州。然元濟方拒命。滋雖有彰義節度之名。所領者仍不過唐隨耳。及滋罷。而用李愬爲帥。仍稱唐隨鄧。不帶彰義軍銜。故云別置。要之名異而實同也。

十二年。彰義軍節度復爲淮西節度。是歲。裴度以宰相領節度事。度入朝。除馬總爲節度。史皆稱彰義軍。未嘗改名淮西也。

十三年。廢淮西節度。是歲。馬總移鎮忠武。卽以蔡隸之。而以光州隸淮南。申州隸鄂岳。自是蔡州無節鎮者六十四年。中和初。秦宗權據之。於是又有奉國軍之名。

十四年。淄青平盧節度使領青淄齊登萊五州。時李師道誅。析其地爲三鎮。

會昌四年升大同都團練使爲大同都防禦使。據此似防禦高於團練。然百官志防禦列團練之下。咸通三年罷武寧軍節度置徐州團練防禦使。隸兗海。又置宿泗等州都團練觀察處置使治宿州。是歲以徐州驕卒逐節度使溫璋。令王式代之。式至鎮誅徐卒三千餘人。因降其使額爲防禦也。據舊書本紀四年四月敕徐州罷防禦使爲支郡隸兗州。則徐州之隸兗海在次年罷防禦以後。表書於三年似誤。

十年置徐泗節度使。是年復置都團練防禦使。增領濠宿二州。是歲正月除王晏權武寧軍節度使。爲討龐助故也。然舊本紀咸通九年龐助陷徐州。殺節度使崔彥曾。其時先已升團練爲節度矣。其秋助伏誅。乃除曹翔徐泗濠團練防禦使。是節度又降爲團練也。

中和二年更大同節度爲雁門節度。領左神策軍。天寧鎮。邊觀察使。徙治代州。案舊史僖宗紀中和元年四月以前大同軍防禦使李克用檢校工部尚書兼代州刺史。雁門已北行營兵馬節度等使。卽表所云雁門節度徙治代州也。是年克用假道太原爲鄭從讜所阻。還屯代州。至次年克用兵至河中。乃兼神策天寧軍鎮。邊觀察使。卽表所云忻代二州隸雁門節度也。神策本禁軍。其時偶隸克用麾下。非雁門帥所得領。似不當入方鎮表。

四年河東節度復領雲蔚二州。雲蔚本克用所部。今移鎮河東。仍以二州益之。

軍也

天復元年。罷感化軍節度。案舊本紀。是年二月。以朱友裕爲華州刺史。感化軍節度使。四月。以潁州刺史朱友恭兼徐州刺史。武寧軍節度使。至天祐二年。全忠封魏王。武寧一道。亦在管內。蓋是年移感化軍名於華州。而徐州軍額仍爲武寧。初非罷此軍節度也。表殆失之。

廿二史考異卷四十八

唐書八

方鎮表三

開元二年置幽州節度諸州軍管內經略鎮守大使。唐會要先天二年二月甄道一除幽州節度經略鎮守使先天二年卽開元元年也相差一年。

置營平鎮守治太平州。幽州管內無太平州恐有譌文。

七年升平盧軍使爲平盧軍節度經略河北支度管內諸蕃及營田等使。唐會要開元七年閏七月張

敬忠除平盧軍節度使始有節度之號八年四月除許欽琰又帶管內諸軍諸蕃及支度營田等使。

十五年幽州節度大使兼河北支度營田事。事當作使。唐會要開元十五年十二月除李尙隱又帶河

北支度營田使。

二十七年幽州節度使增領河北海運使。唐會要是年十二月除李適之又加河北海運使。

二十八年平盧軍節度使兼押兩蕃渤海黑水四府經略處置使。唐會要是年二月除王斛斯又加押

兩蕃及勃海黑水等四府經略處置使。

天寶元年更幽州節度使爲范陽節度使。唐會要是年十月除裴寬爲范陽節度使。其年安祿山爲平盧節度。三年代寬鎮范陽仍領平盧軍。

至德元載置澤潞沁節度使。以程千里爲上黨節度。

二載升河中防禦爲河中節度兼蒲關防禦使領蒲、晉、絳、隰、慈、虢、同七州。案舊史肅宗紀乾元元年九

月以趙泚爲蒲州刺史蒲同號三州節度使此河中置節鎮之始所領不過三州二年七月以王璵爲蒲州刺史蒲同絳三州節度使易號以絳所領仍不過三州時已置號華節度使以來璵爲之故不及號也。至上元元年二月以崔寓爲蒲州刺史蒲同、晉、絳等州節度使或隰慈二州亦在管內乎。至德中蒲州未有河中之名其置節度在乾元元年表皆誤。

乾元二年河中節度兼河中尹。案舊本紀上元元年三月升蒲州爲河中府其四月以蕭華爲河中尹充同、晉、絳等州節度觀察處置使表書於乾元二年誤。

廣德元年置相衛節度使治相州是年增領貝、邢、洺、號洺相節度衛州復隸澤潞未幾復領號相衛六州節度使。相、衛、貝、邢、洺凡五州而云六州疑有譌脫。

大厯元年相衛六州節度賜號昭義軍。是時薛嵩爲節度使昭義之號本在相州後乃移於潞州也地理志永泰元年昭義節度使薛嵩表置磁州六州之名蓋合磁言之然廣德初尙未有磁州當於永泰

元年書增領磁州。號相衛六州節度使。方爲得之。

十年瀛州隸幽州盧龍節度。滄州隸義武軍節度。德州隸淄青平盧節度。是歲昭義帥薛勣爲其下所逐。田承嗣盜有其地。詔遣諸道討之。李正己得德州。李寶臣得滄州。而承嗣將吳希光亦以瀛州降。其時朱滔方恭順。故卽以瀛與之也。義武當爲成德之譌。自是承嗣失瀛滄德三州。而得相衛。洺。貝四州。建中元年。昭義軍節度兼領澤潞二州。徙治潞州。案澤潞與昭義本是兩鎮。李抱玉爲澤潞帥。移鎮鳳翔。兼領澤潞。以從弟抱真爲留後。大曆十一年。昭義帥李承昭病。以抱真權知磁邢兵馬留後。其時昭義所管祇有兩州耳。至是抱真正授節度。遂兼澤潞之地。

三年罷成德軍節度。置恆冀都團練觀察使。治恆州。深趙都團練觀察使。治趙州。是歲李惟岳爲王武俊所殺。分成德管內爲三鎮。以武俊爲恆冀都團練觀察使。康日知爲深趙都團練觀察使。張孝忠爲易定節度使。名其軍曰義武。

置義武軍。案表於義武一鎮。闕略不完。以例言之。當云置義武軍節度。領易定滄三州。治定州。又於貞元三年。書以滄州隸橫海軍節度。乃爲得之。

興元元年。置晉慈隰節度使。治晉州。尋罷。復置河中節度使。領河中府。同絳。虢。陝四州。是歲李懷光據河中以叛。四月。以唐朝臣爲河中尹。河中同晉絳節度使。遙領使名。未能有其地也。八月。以渾瑊兼河

中絳州節度使。充河中同華陝虢行營副元帥。以馬燧兼晉慈隰節度使。燧又讓於康日知。自是分爲二鎮。表當先云。復置河中節度使。次云。置晉慈隰節度使。治晉州。乃得其實。此文先後失序。其云晉慈隰節度尋罷。尤誤也。

廢恆冀深趙二觀察。復置成德軍節度使。領恆冀深趙四州。初。恆趙分鎮。王武俊自以功大賞薄。不受命。與田悅李納朱滔合從。阻兵兩載。及德宗幸奉天。武俊首先歸順。因授節度。防以深趙。與之明年。朱滔死。並以德棣還之。

貞元三年。置橫海軍節度使。以程懷直爲節度使。

四年。置晉慈隰防禦觀察使。時康日知已卒。除崔漢衡爲觀察使。加都防禦。不稱節度。依表例。當先云罷晉慈隰節度。而後云置防禦也。

十五年。罷河中節度。置河中防禦觀察使。是歲。渾瑊薨。除杜確河中尹。河中絳州觀察使。不加節鎮。其後鄭元杜黃裳等。復爲節度矣。

元和三年。罷晉慈隰觀察使。以三州隸河中節度。案。韋丹傳。拜晉慈隰觀察使。閱歲。自陳所治三州。非要害地。不足張職。爲國家費。不如屬之河東。帝從之。正謂此也。舊本紀。元和二年正月。以杜黃裳檢校司空同平章事。兼河中尹河中晉絳等州節度使。則河中兼領晉慈隰。蓋在元和二年。

四年置保信軍節度使。領德棣二州。成德帥王士真卒。子承宗請獻德棣二州。因置保信軍。別除薛昌朝爲節度。既而承宗拒命。吐突承璀出兵無功。乃罷保信軍。復以二州隸成德軍。

十三年。以德棣二州隸橫海節度。時吳元濟旣平。橫海程權亦請入朝受代。承宗始獻德棣二州。乃除鄭權橫海軍節度。德棣滄景觀察使。尋又以烏重胤代之。

十四年。罷河中節度。置河中都防禦觀察使。是歲除李絳河中觀察使。宰相皇甫鏐惡絳。故不授節制。其明年以韓弘代絳。仍爲節度。

長慶元年。置深冀節度。治深州。尋罷。是歲八月。以深州刺史牛元翼爲深冀節度使。尋授元翼成德軍節度。並領深冀。

置瀛莫都團練觀察使。治瀛州。尋升爲節度使。是歲三月。幽州帥劉總移鎮。析其地。以盧士玫爲瀛莫都團練觀察使。七月。朱克融作亂。就升士玫節度使。未幾。士玫亦被囚。此鎮遂廢。

置德棣二州觀察處置使。案舊本紀。長慶二年二月。以李光顏爲滄州刺史。橫海軍節度使。以李全略爲德州刺史。德棣等州節度使。卽其事也。表係於元年。又不云節度。當以舊紀爲正。未幾。光顏還鎮許州。仍以全略爲橫海軍節度。合二鎮爲一。二年。置晉慈都團練觀察使。以李寰爲使。

大和元年。升晉慈觀察使爲保義軍節度。是年罷。寰自觀察遷節度。尋移鎮橫海。遂罷保義軍。三年。置相衛澶三州節度使。史憲誠上書求覲。詔移鎮河中。以其子孝章爲相衛澶節度使。既而魏軍亂。殺憲誠。立何進滔。遂罷相衛節度。而徙孝章鎮鄜坊。

罷橫海節度。更置齊德節度使。鎮德州。尋廢。復置。更號齊德滄節度使。案。是歲五月。誅李同捷。以傅毅

代李祐鎮橫海。而別以李有裕本名古爲齊德節度。蓋析爲二鎮。初未罷橫海節度也。其八月。以殷侗爲齊德滄節度使。始去橫海之號。

會昌四年。澤州。隸河陽節度。澤州以下九字。當在第二格。誤入第一格。

中和二年。節度使孟方立。徙昭義軍於邢州。而兼領潞州。自是五州有二昭義節度。案。自會昌平劉稹以後。昭義正有潞。邢。洺。磁。四州。表云五州者。誤也。方立既稱節度。而李克用復表其弟克脩爲昭義節度。治潞州。由是有兩昭義軍。此中和三年事。表敘此事。失之太略矣。

光啓元年。賜河中節度。號護國軍節度。時王重榮爲節度使。

乾寧二年。齊州。隸武肅軍節度。上卷云。析齊州。置武肅軍防禦使。此云節度。似誤。

天復元年。二昭義軍節度合爲一。復領澤州。案。中和三年。分立昭義二鎮。大順元年。李克用取邢。洺。磁

三州。以安金俊爲團練使。二年。以李存孝爲邢州留後。乾寧元年。馬師素爲邢洺節度使。皆克用表授。

故不帶昭義軍號也。光化元年，葛從周取邢洺磁三州，朱全忠表從周爲留後，復稱昭義軍。其冬，潞州節度薛志勤卒，李罕之據潞以叛。全忠因表爲昭義節度。明年，以丁會代之。自是兩昭義軍皆屬於汴。旣而李嗣昭復取澤潞，克用表孟遷爲昭義節度。天復元年，汴軍攻澤潞，孟遷以城降，仍除丁會昭義節度。卽表所云二節度合爲一也。據舊本紀，是年全忠奏請於昭義節度官階內，落下邢洺磁三州，卻以澤州爲屬郡。其河陽節度古以懷州爲屬郡，從之。則是分邢洺磁與昭義爲二鎮，初非合而爲一。表殆誤矣。又考五代史孟方立傳，稱李克脩爲澤潞節度使，而李罕之以澤州刺史得據潞府，似澤州久在昭義管內，但此時始著爲令耳。

方鎮表四

景雲元年，安西都護四鎮經略大使。都護下當有領字四鎮，謂安西、疏勒、于闐、焉耆也。安西治龜茲地。置河西諸軍州節度、支度營田、督察九姓部落、赤水軍兵馬大使。案唐會要，景雲二年四月，賀拔延嗣爲涼州都督、充河西節度使。自此始有節度之號。至開元二年四月，除楊執一，又兼赤水九姓本道支度營田等使，表俱繫之元年，似疏。

先天元年，北庭護、領伊西節度等使。唐會要，先天元年十一月，史獻除伊西節度、兼瀚海軍使。開元五年，置隴右節度、兼隴右道經略大使。唐會要，開元元年十二月，鄯州都督陽旰，除隴右節度，自

此始有節度之號。至十五年十二月，除張志亮，又兼經略支度營田等使，已後爲定額。

六年，西安都護領四鎮節度支度經略使。唐會要：開元六年三月，楊嘉惠除四鎮節度經略使。

七年，升劍南支度營田處置兵馬經略使爲節度使，兼昆明軍使。唐會要：開元五年二月，齊景冑除劍

南節度支度營田兼姚嵩等州處置兵馬使，因此始有節度之號。表云七年，似誤。又青城山常道觀有

石刻，開元十三年，張敬忠上表，其署銜云益州大都督府長史、劍南道節度大使、兼本道採訪經略大

使，則其時又有大使之名矣。

天寶十三載，安西四鎮復兼北庭節度。是年三月，以安西四鎮節度封常清兼伊西北庭節度。

至德元載，襄南陽二郡皆置防禦守捉使，尋升南陽防禦爲節度使。時魯炆以南陽太守兼守捉防禦

使，尋遷南陽節度使，襄陽防禦使則魏仲犀也。

置興平節度使，以李奐爲之。

天水郡太守兼防禦守捉使及大震關使，蓋以郭英乂兼之。

二載，廢南陽節度使，升襄陽防禦使爲山南東道節度使，領襄、鄧、隨、唐、安、均、房、金、商九州。均、房、金、商四

州，卽興平節度所領之上洛四郡也。興平節度至上元二年始廢，不應此時卽以四郡隸襄鄧，此事之

可疑者。又考是年正月，以魏仲犀爲襄陽山南道節度使，五月，魯炆自南陽走襄陽，除襄鄧十州節度

使。乾元二年。吳移鎮鄖。當以史闕代之。上元元年。闕以軍亂被殺。乃除來瑱襄鄧十州節度使。據魯。吳來瑱傳。俱云十州。而表稱九州。亦未甚合。竊意吳爲節度時。均房四州未必在襄鄧管內。迨來瑱建節之時。李兔已移鎮。因以四州隸之耳。

乾元二年。以夔。峽。忠。歸。萬五州。隸夔州。案乾元元年。已罷夔峽節度矣。此云隸夔州。當有脫譌。

上元元年。荆南節度使兼江南尹。是年。升荆州爲江陵府。江南當作江陵。

荆南節度。復領澧。朗。忠。峽四州。以呂誼爲節度使。次年。增領潭。岳諸州。亦誼所請也。

二年。廢興平節度使。李兔移鎮東川。此鎮遂廢。

置武關內外四州防禦觀察使。卽金。商。均。房四州也。時呂誼等言。來瑱得士心難制。因別置四州觀察。

瑱所領止六州。寶應元年。詔瑱移鎮淮西。而以裴茂爲襄鄧七州防禦使代之。置淮西十六州節度表在上元二年。此事

雖不果行。亦宜見於表也。

廣德元年。升山南西道防禦守捉使爲節度使。以張獻誠爲使。

尋降爲觀察使。大曆三年。獻誠以疾辭位。除其弟獻恭爲節度觀察使。非降爲觀察也。

大曆元年。置邛南防禦使。治邛州。尋升爲節度使。未幾廢。置劍南西山防禦使。治茂州。未幾廢。永泰元

年。劍南節度使郭英乂。爲兵馬使。崔旰所殺。邛州柏茂林等起兵討旰。蜀中亂。是年。以宰相杜鴻漸充

山南西道、劍南東川等道副元帥、兼劍南西川節度使、鴻漸卽奏授柏茂林邛州刺史、邛南防禦使、崔旰茂州刺史、劍南西山防禦使、未幾、又奏遷茂林爲邛南節度、而以旰爲西川節度行軍司馬、明年、鴻漸入朝、旰遂除劍南節度矣。

建中元年、升山南西道觀察使爲節度使、時賈耽爲節度使、

貞元十一年、西川節度、增領統押近界諸蠻及西山八國雲南安撫使、時韋皋爲節度使、

元和十年、置唐、隨、鄧三州節度使、以高霞寓爲使、

十一年、廢唐、隨、鄧節度使、是年復置、高霞寓與吳元濟戰敗、以袁滋代之、改稱彰義軍節度、領唐、隨、鄧

三州、故云廢也、未幾罷滋、以李愬代之、仍稱唐、隨、鄧節度、

十二年、廢唐、隨、鄧節度使、以唐、隨、鄧三州、還隸山南東道、淮西已平、以李愬充山南東道節度、襄、鄧、隨、

唐、復、郢、均、房等州觀察使、仍合二鎮爲一、

大和六年、廢荆南節度使、置都團練觀察使、是歲、段文昌移鎮西川、除崔瑄荆南都團練觀察使、不加

節鎮。

開成三年、復置荆南節度使、李石以宰相除荆南節度、

大中三年、升秦州防禦守捉使爲秦成兩州經略天雄軍使、是年、鳳翔節度使李玘、奏收復秦州、

五年置歸義軍節度使。以沙州刺史張義潮爲之。

咸通八年置定邊軍節度、觀察處置統押近界諸蠻、並統領諸道行營兵馬制置等使。以李師望爲使。

十一年廢定邊軍節度使。去年師望戰沒、以竇滂代之。滂亦遁去。此軍遂罷。

光啓元年升金商都防禦使爲節度、兼京畿制置萬勝軍等使。是年罷節度。案舊本紀光啓二年六月。

以楊守亮爲金州刺史、金商節度京畿制置使。表列於元年。誤也。其七月守亮除山南西道節度使。三

年正月又除楊守宗金商節度。五月詔守宗權知許州事。自是金商不除節度。

置武定軍節度使、治洋州。舊本紀光啓二年正月以李茂貞爲洋州刺史、武定軍節度使。表在元年亦

誤。

二年升興鳳二州防禦使爲感義軍節度使。以楊晟爲使。晟敗走而滿存代之。竝領利州。

文德元年賜山南東道節度號忠義軍節度。秦宗權將趙德誣以山南東道七州降。授節度使。並賜軍

號。德誣卒。子匡凝代。

置永平軍節度使。領邛蜀黎雅四州。以王建爲使。

升彭州防禦使爲威戎軍節度使。領彭文成龍茂五州。楊晟失興鳳走。據文龍成茂四州。田令孜以已

故將假威戎軍節度使守彭州。

大順二年廢永平軍節度使。王建已得西川，卽廢此軍而兼其地。

景福元年彭州隸龍劍節度。是年王建攻楊晟克之。

乾寧四年更感義軍節度曰昭武軍節度。以蘇文建爲使。治利州。

光化元年升昭信軍防禦爲節度使。以馮行襲爲使。

置武貞軍節度使領澧、朗、淑三州。以雷滿爲使。

天祐二年賜昭信軍節度號戎昭軍節度。舊本紀金州馮行襲奏當道昭信軍額內一字與元帥全忠

諱字同乃賜號戎昭軍蓋全忠祖諱信故也。

三年忠義軍節度復爲山南東道節度。趙匡凝爲朱全忠所攻奔淮南因去忠義之號。

廢武定軍節度。馮行襲移鎮匡國軍因併均房入襄鄧也。是時有兩武定軍此所省者均州之武定若

洋州之武定乃王建所有非全忠所能廢。

升夔忠涪防禦使爲鎮江節度使。此與利閬興文兩節度皆王建所置。

廿二史考異卷四十九

唐書九

方鎮表五

至德元載置淮南節度使。以高適爲之。

領揚、楚、滁、和、壽、廬、舒、光、蘄、安、黃、申、沔十三州。治揚州。尋以光州隸淮西。此當書郡名。乾元以後乃改稱

州耳。東川節度領梓、遂等州。江東領杭州。亦當稱郡名。又案方鎮表第四是年置淮南西道節度使。領義陽、弋陽、潁川、滎陽、汝南五郡。義陽卽申州也。當云尋以光、申二州隸淮西。淮南所領止十一州耳。

二載置江東防禦使。是歲八月以崔渙爲江東採訪防禦使。案韋陟傳永王兵起授御史大夫江東節度使。其與來瑱高適同盟載書稱淮西節度使瑒江東節度使陟淮南節度使適是江東置節度亦在至德二載表何以不書。

乾元元年置浙江西道節度兼江寧軍使治昇州。尋徙治蘇州。案舊本紀是年三月江寧置節度使不言治所亦不知除授何人。十二月以昇州刺史韋黃裳爲蘇州刺史浙西節度使。此浙西節度治蘇州之證。黃裳旣自昇移蘇或在昇時已領節度。故表云治昇州。徙治蘇州也。乃次年六月顏真卿除昇州

刺史充浙江西道節度使。上元元年正月，侯令儀除昇州刺史，充浙江西道節度，兼江寧軍使。則是治蘇州未幾，仍治昇州。表既闕而不書，而表云乾元二年廢浙江西道節度者，亦未足深信也。

置浙江東道節度使，治越州。乾元二年，除呂延之上元元年，除趙良弼。

置洪吉都防禦團練觀察處置使，兼莫徭軍使。案地理志，洪州有南昌軍。乾元二年置，未見有莫徭軍。三年，沔州隸鄂岳節度。是年置鄂岳都團練使，非節度也。永泰元年，表云，蘄黃二州隸鄂岳節度，其失與此同。

上元二年，浙江西道觀察使徙治宣州，罷領昇州。是年正月，除季廣琛宣州刺史，充浙江西道節度使。時劉展初平，省昇州入宣潤二州，故移節度治宣州，不云改爲觀察也。至大厯初，韋元甫、李栖筠始稱浙西團練觀察使。

廣德二年，廢東川節度，以所管十五州隸西川節度。時嚴武爲劍南節度使，兼領兩川。洪吉都防禦團練觀察使更號江南西道。時張鎬爲觀察使。

大厯元年，復置劍南東川節度使。杜鴻漸以副元帥領西川節度，仍分置東川節度，令山南西道張獻誠兼領之。

浙江西道觀察使罷領宣歙二州。此後觀察使韋元、李栖筠、李涵、李道昌皆帶蘇州刺史，蓋徙治蘇州。

而表亦失書。

復置宣歙池等州都團練守捉觀察處置使。以陳少游爲之。

二年廢劍南東川節度。置都防禦觀察使兼靜戎軍使。治遂州。尋復置節度使。治梓州。是年除遂州刺史杜濟。劍南東川節度觀察等使。表云。廢節度復置。蓋杜濟先除防禦。而後進節度也。其明年鮮于叔明代濟爲東川節度使。遂州刺史。則其時尙治遂州。未幾移治梓州。乃兼梓州刺史也。

五年廢浙江東道節度使。置都團練守捉及觀察處置等使。是年浙東觀察使薛兼訓移鎮河東。以陳少游爲浙江東道團練觀察使。俱不稱節度。

六年廢福建節度使。置都團練觀察處置使。案舊本紀。大厯四年已有福建觀察使李承昭。

十四年合浙江東西道。置都團練觀察使。表不著治所。蓋仍治蘇州也。

廢宣歙池觀察使。置團練使。案舊本紀。是年六月罷宣歙池鄂岳沔二都團練觀察使。此置字衍文。

置鄂州觀察防禦使。防禦當作團練。

建中元年分浙江東西道都團練觀察使爲二道。浙西觀察。蓋以韓滉爲之。

二年合浙江東西二道觀察置節度使。治潤州。尋賜號鎮海軍節度。是年五月加蘇州刺史韓滉檢校禮部尙書。潤州刺史。充鎮海軍節度。浙江東西道觀察處置等使。始自蘇州徙治潤州。

四年升江南西道都防禦團練觀察使爲節度使。以嗣曹王皋爲之。舊本紀在三年十月。興元元年升壽州團練使爲都團練觀察使。領壽、濠、廬三州。以張建封爲之。濠當作豪。

貞元元年廢江南西道節度使。復置都團練觀察使。曹王皋移鎮荆南。以鄂岳觀察使李謙代之。不加節度。

三年分浙江東西爲二道。復置浙江西道都團練觀察使。領潤、江、常、蘇、杭、湖、睦七州。治蘇州。是歲韓滉卒。不除節度。以白志貞爲潤州刺史。浙西觀察使皇甫政爲越州刺史。浙江觀察使表不云罷鎮海軍節度者。史文之漏也。其下一格當云。復置浙江東道都團練觀察使。領某某州。治越州。而今無其文。又是年復置宣歙池觀察使。以劉贊爲之。而表亦無之。皆傳寫脫之也。此後白志貞、王緯、李若初、李錡除浙西

觀察。俱帶潤州刺史。則其時尚治潤州。表云治蘇州。亦誤。

四年廢壽州都團練觀察使爲團練使。張建封遷徐泗豪節度使。因去都團練之號。仍爲本州團練也。

十五年置安黃節度觀察使。治安州。以伊慎爲使。十九年賜軍號奉義以寵之。

十六年置舒、廬、滁和四州都團練使。案舊本紀元和二年停舒、廬、滁和四州團練使。表旣書置團練於

前而不書罷團練于後。亦疏漏也。

元和元年罷奉義軍節度使。升鄂岳觀察使爲武昌軍節度使。增領安黃二州。是歲伊慎入朝。因除鄂

岳沔觀察使韓皋爲鄂岳蘄安黃等州節度使兼領之而省安黃節鎮也。順宗實錄永貞元年五月以韓皋爲鄂岳觀察武昌軍節

度使似武昌軍先已有之

二年升浙江西道都團練觀察使爲鎮海軍節度使。時李錡由浙西觀察進節度使。錡反以李元素代之。

四年廢浙江西道節度使復置觀察使。案元和三年韓皋自武昌移鎮海軍節度浙江觀察使仍帶節

度。其五年坐事奪一月俸料。史但稱浙西觀察蓋已罷節度使額矣。

五年罷武昌軍節度使置鄂岳都團練觀察使。案元和三年韓皋移鎮當以郝士美代之。五年士美授

河南尹而呂元膺代之。紀傳稱士美爲鄂岳觀察使似元和三年以後武昌已無節度之名。

六年浙西觀察罷領鎮海軍使宣歙團練使罷領采石軍使。案是年十月詔諸道都團練使足修武備

以靖一方而別置軍額因加吏祿亦既虛設頗爲浮費其潤州鎮海軍宣州采石軍越州義戎軍。當作義勝

洪州南昌軍福州靖海軍。地理志作寧海軍等使額並宜停表惟載鎮海采石二軍餘皆無之。

大和九年復置鎮海軍節度使數日廢既而復置踰月又廢。案大和八年十一月以李德裕爲鎮海軍

節度使浙江西道觀察等使。九年四月德裕爲太子賓客分司東都而除賈餗浙西觀察代之。此一置

而一罷也。是月賈餗拜相以路隨爲鎮海軍節度浙西觀察等使。七月隨卒以崔郾爲浙西觀察使。此

再置而再罷也。數日當爲數月。傳寫之譌。

大中元年。復置武昌軍節度使。是年。宰相盧商。出爲鄂岳觀察使。加節鎮以寵之。然敬宗寶曆初。牛僧孺亦以宰相出爲武昌軍節度。表卻闕而不書。

二年。罷武昌軍節度使。案。盧商鎮武昌。至十二年。始以疾求代。而張毅夫代之。則武昌節度之罷。似當在十二年以後。表乃云二年罷節度。四年復置。六年又罷。所未詳也。

咸通三年。置鎮海軍節度使。案。宰相表。咸通四年五月。杜審權檢校吏部尚書。同平章事。鎮海軍節度使。表書置節度於三年。舊本紀在五年。又不書節度。皆互異。

八年。廢鎮海軍節度使。審權除尚書左僕射。以楊收爲浙西觀察使代之。

六年。升江南西道團練觀察使爲鎮南軍節度使。以嚴譔爲之。

十一年。置鎮海軍節度使。宰相表。是年九月。曹確檢校司徒同平章事。鎮海軍節度使。舊本紀。不書節度。而書觀察。又乾符元年二月。趙隱檢校兵部尚書。鎮海軍節度使。舊本紀。不書節度。而書都團練觀察。至五年除高駢。乃稱節度使。

中和三年。升浙江東道觀察使爲義勝軍節度使。以劉漢宏爲之。

光啓三年。改義勝軍節度爲威勝軍節度。時董呂遂劉漢宏。自稱浙東觀察使。因改軍號寵之。

文德元年。置忠國軍節度使。治湖州。以李師悅爲之。

復置武昌軍節度。時杜洪據鄂州。自稱留後。因以武昌軍節授之。

龍紀元年。置杭州防禦使。以錢鏐爲之。

復升江南西道觀察使爲鎮南軍節度使。以鍾傳爲之。

景福元年。置龍劍節度使。領龍、劍、閩四州。以楊守貞爲之。

升宣歙團練使爲寧國軍節度。以楊行密爲使。據行密傳及通鑑。則寧國軍之置。乃在大順元年。與此

不合。行密已得淮南。表田頵爲寧國軍節度。守宣州。

二年。升武勝軍防禦使爲都團練。蘇、杭等州觀察使。尋廢。徙鎮海軍節度使。治杭州。是歲閏五月。以武

勝防禦使錢鏐爲蘇、杭觀察使。九月。以鏐爲鎮海軍節度使。鎮海軍本在潤州。今以杭州刺史兼之。

乾寧三年。改威勝軍節度爲鎮東節度。是歲。錢鏐討董昌。克之。朝廷除宰相王搏爲威勝軍節度使。旣

而兩浙吏民上表。請以鏐領浙東。乃改軍名鎮東。令鏐兼領之。

四年。置武信軍節度使。領遂、合、昌、渝、瀘五州。王建旣得東川。析置此鎮。以其養子宗佶爲節度

。升福建都團練觀察處置使爲威武軍節度使。以王審知爲之。據審知神道碑。蓋兼領三司發運等使。

天復三年。廢寧國軍節度使。復爲都團練觀察使。楊行密攻田頵。殺之。以臺濛爲宣州觀察使。

天祐二年置歙、婺、衢、睦四州都團練觀察處置使。此楊行密所置以陶雅爲之。

方鎮表六

天寶十載置安南管內經略使。領交、陸、峯、愛、驩、長、福祿、芝、武義、演、武安十一州。自天寶至至德有郡無州。表當書郡名。不當書州名也。又案地理志。演州貞觀中廢。廣德二年析驩州復置。則天寶中不當有演州。志與表當有一誤。

至德元載升王府經略討擊使爲嶺南節度使。唐會要。至德二年正月。賀蘭進明除嶺南五府經略兼節度使。嶺南自此始有節度之號。表列於元載。與會要小異。進明亦未之任也。

廣德二年改安南節度使爲鎮南大都護都防禦觀察經略使。案地理志。至德二載改安南都護府曰鎮南都護府。蓋肅宗惡祿山。凡郡縣名有安字。皆易字。不應至是乃改鎮南也。

大歷元年更鎮南曰安南。據地理志在三年。

四年湖南觀察使徙治潭州。舊本紀。是年二月。以湖南都團練觀察使衡州刺史韋之晉爲潭州刺史。因是徙湖南軍于潭州。

置辰、溪、巫、錦、業五州都團練守捉觀察處置使。案舊本紀。大歷十年。罷辰、錦、溪、獎五州經略使。復隸黔中。表卻失書獎州。卽業州也。巫州後改澉州。

十二年置黔州經略招討觀察使。以李國清爲之。

元和十五年廢邕管經略使。以南蠻傳考之。蓋罷邕管入容管。以嚴公素爲容管經略統之。
長慶二年復置邕管經略使。以崔結爲之。

咸通三年分嶺南節度爲東西道。改嶺南節度爲嶺南東道節度。時韋宙爲嶺南節度使。改稱東道。據

鑑

舊本紀謂是年以邕管經略使鄭愚充嶺南東道節度使。以宋戎爲嶺南西道節度。皆非也。

升邕管經略使爲嶺南西道節度使。增領蒙州。蒙當爲象字之譌。據通鑑及舊本紀。是時嶺南西道增

領龔、象、藤、巖四州。表祇載象州。未免漏略矣。嶺南分鎮之議。起於邕管經略使蔡京。朝廷因以嶺南西

道節度授之。其年京爲軍士所逐。以鄭愚代之。明年愚請代。乃除康承訓。五年承訓罷。又除張茵。

七年升安南都護爲靜海軍節度使。以高駢爲之。

中和三年升湖南觀察使爲欽化軍節度。閔頊自觀察加節度使。通鑑作閔勛。

光啓元年改欽化軍節度爲武安軍節度使。通鑑在二年。案僖宗紀。光啓二年淮西將黃皓殺欽化軍

節度使閔勛。昭宗紀。景福二年鄧處訥陷潭州。欽化軍節度使周岳死之。至乾寧元年始稱武安軍節

度使。鄧處訥則是武安軍之名。當改於乾寧元年矣。

大順元年賜黔州觀察使號武泰軍節度。以王建肇爲之。黔中置節度。始於是年。而通鑑稱至德元載。

升五溪經略使爲黔中節度。似未然也。舊史僖宗紀。光啓元年。有保鑾都將兼黔中節度觀察使曹誠。三年。有保鑾都將黔中節度觀察使李鋌。

乾寧二年。賜嶺南東道節度號清海軍節度。是歲。以嗣薛王知柔爲清海軍節度使。知柔薨。徐彥若代之。彥若卒。遂爲劉隱所據。

四年。升容管觀察使爲寧遠軍節度使。是歲。特置此軍。以河東大將蓋寓遙領節度使。天復元年。以董彥弼爲節度。亦不之鎮。

光化三年。升桂管經略使爲靜江軍節度使。案。昭宗紀。乾寧三年。安州防禦使宣晟。陷桂州。靜江軍節度使周元靜。部將劉士政死之。乾寧紀元。在光化之前。似靜江軍號。先已有之。

天復三年。武泰軍節度。徙治涪州。黔中時爲王建所併。以養子宗本爲武泰留後。宗本言黔州地多瘴癘。請徙治涪州。

廿二史考異卷五十

唐書十

宗室世系表上

代祖玄皇帝諱曷。代祖卽世祖。避太宗諱也。諸紀傳仍書世祖。無定例。高祖紀曷作曷。

宗室世系表下

太宗十四子。長曰恆山愍王承乾。太宗諸子傳作常山愍王。目錄同。李達之李載義傳俱云恆山愍王。案地理志鎮州常山

郡。本恆州恆山郡。元和十五年。避穆宗名。更傳稱常山愍王者。後人追改之也。宰相世系表范陽李氏自云常山愍王之後。

顏杲卿安祿山史思明諸傳稱常山太守。皆從追改之名。惟明皇紀書恆山郡太守顏杲卿。此當時本

稱也。藩鎮冀傳自李寶臣至王承宗皆書恆州。自王廷湊以後乃書鎮州。甚得史法。惟載李絳鎮州

世相繼一語。亦當作恆字。偶未檢照耳。薛稷傳伯陽子談尙恆山公主。公主傳作常山公主。談亦一作譚亦一

從本稱。一從改名。

定著三十九房。終唐之世。有宰相十一人。郇王房有林甫。回。鄭王房有程。石。福。小鄭王房有勉。夷簡。宗閔。

恆山王房有適之。吳王房有峴。惠宣。太子房有知柔。案表書宰相之例。必云相某宗。如程宇表臣。相

敬宗石字中玉。相僖宗之類是也。獨太子太傅同平章事福。不云相僖宗。而宰相表亦無福名。考福本傳。初拜劍南西川節度使。同中書門下平章事。後爲山南東道節度使。以勞檢校司空同中書門下平章事。蓋唐自中葉以後。節鎮加宰相銜者極多。謂之使相。亦稱外宰相。非真宰相也。鄭畋傳。陳敬瑄欲畋曰。外宰相安得論品乎。卒不肯處其下。方技桑道茂傳。李鵬爲盛唐令。道茂曰。君位止此。而冢息位宰相。次息亦大鎮。子孫百世。鵬卒後。石至宰相。福歷七鎮。諸孫通顯云。此可證福之未嘗入相。而世系表以福列宰相十一人之數。誤矣。又考定州刺史房有麟。相肅宗。此則十一人之一。而計目轉不及焉。或當數而不數。或不當數而數。甚矣其舛也。

宰相世系表一上

裴氏。宰相十七人。南來吳有耀卿。行本。坦。中眷。有光。庭。遵慶。樞。贄。案。僖宗朝宰相。坦。系出中眷。非出

南來吳。此必因南來吳裴亦有名坦者。故致誤爾。南來吳之裴坦。官太平令。未嘗任宰相也。

劉氏。宰相十二人。彭城房有滋。文靜。瞻。尉氏房有仁軌。瑒。臨淮房有禕之。南陽房有泊。廣平房有祥道。

景先。從一。丹陽房有鄴。南華房有晏。河南劉氏宰相一人。崇望。案。宰相表有劉幽。求。相。睿宗玄宗。失

載其世系。

宰相世系表一下

陳氏。齊王建爲秦所滅。三子昇、桓、軫。軫楚相。封潁川侯。因徙潁川。稱陳氏。生嬰。秦東陽令。史嬰生成安君餘。陳祖范曰。案戰國策。軫本秦人。史記。軫與張儀俱事秦惠王。惠王在位日久。歷四王而後。至始皇。始皇二十五年始滅齊。遷王建於共。年代相去若此。安有建生軫之理邪。嬰之爲衆推戴也。其母云。自吾爲汝家婦。未聞汝先古有貴者。若嬰是楚相子。齊王後。母言不符矣。嬰與餘同時起兵。嬰東陽人。餘大梁人。一屬項。一佐趙。安有一家父子之理。

準字道基。晉太尉廣陵元公。生伯珍。建興中。渡江居曲阿新豐湖。生匡。二子赤松。世達。案陳書南史本紀。俱云準生匡。匡生達。此表以匡爲準孫。與前史異。世達單稱達者。疑避唐諱。

文讚三子。談先。霸先。休先。談先。梁東宮直閣將軍。義興昭烈公。案陳書高祖之兄名道談。不名談先。道談始贈長城縣公。繼贈義興郡公。改始興郡王。史從其後封。當云始興王。不當云義興公也。

宰相世系表二上

杜氏。秀二子。果。皎。皎生徽。隋懷州長史。豐鄉侯。生吒。吒卽如晦之父也。案舊唐書杜如晦傳。曾祖皎。當是高祖。

周贈開府儀同三司。遂州刺史。高祖徽。當是曾祖。周河內太守。祖果。周溫州刺史。入隋。工部尙書。義興公。周

書有傳。父吒。隋昌州長史。新書如晦傳亦云。祖果有名周。隋開。是果爲如晦之祖審矣。表乃以果與皎爲昆弟。是不然也。周書杜杲傳云。祖建。魏輔國將軍。贈豫州刺史。父皎。儀同三司。杲果字形相似。又是

雙聲。故陳果仁一作杲仁。薛仁杲一作仁果。此杜杲，卽杜果也。其祖名建，與唐表傳亦互異。又考舊書淹傳祖業，周豫州刺史。父徵，河內太守。似淹與吒卽咤字非親昆弟。史文之乖刺如此。

元穎、元絳，下空一格。案審權卽元絳子，中間不應空格。又據舊史，審權與蔚均爲元絳之子，表別列蔚於元絳之左，且比元絳超一格，亦恐誤也。

杜氏宰相十一人，如晦、淹、元穎、審權、讓能、黃裳、佑、悰、正倫、鴻漸、暹。案宰相表有杜景佺，相武后。

隴西李氏宰相十人，武陽房有迴承、姑臧、大房、有義、琰、蔚、揆、逢吉、丹陽房有靖、昭德。又有道廣、元紘、晟、趙郡李氏宰相十七人，南祖有游道、藩、固言、日知、敬玄、紳、元素。東祖有絳、嶠、珏。西祖有懷遠、吉甫、德裕、遼東有泌、江夏有郾、磔。漢中有安期。案高宗朝宰相李義府，自言系出爲郡。文宗朝宰相李訓、揆之族孫，武宗朝宰相李讓夷，系出隴西。又武后時有宰相李景謨，表失載。宰相表又有李忠臣、李懷光二人，皆叛臣，故不敘其系。

宰相世系表二中

太原王氏，霸字儒仲，居太原。晉陽生成，咸十九世孫澤，字季道，雁門太守。案王霸被徵，在後漢之初。

而季道兄弟，總角爲郭林宗所知。林宗卒於建寧初，距光武初僅百三十四年，而自霸至澤，傳世二十。

此理之必無者。

視二子渾濟渾晉錄尙書事京陵元侯生湛字處沖汝南內史。案晉書湛爲渾之弟濟則渾之子故濟稱湛爲叔此表差誤。

王氏宰相十三人琅邪有方慶璵搏璿太原有溥縉珪涯峻播鐸京兆有徽德真。案宰相表有王本立王及善皆相武后表闕其世系華陰王氏有孝傑已見於表而計目不及何疏漏至此。

魏氏萬生芒季季生武子鑾鑾生悼子悼子生昭子絳。案春秋傳絳諡莊子其諡昭者乃曼多也表據史記與左氏異。

潛字蘊華子敖。沈炳震曰舊書魏蕃傳潛于敖甥後琮爲相潛歷顯官琮謂于琮敖之子於潛爲中表舊書傳誤以于作子表遂列敖於潛下以舅爲子誤之甚也。

溫氏大雅字彥弘彥博字大臨彥將字大有。案本傳大有字彥將歐陽公集古錄疑其事謂兄弟義當一體而名大者字彥名彥者字大不應如此。洪景伯始考正之云顏魯公作顏勤禮碑敘顏溫二家之盛云思魯大雅俱仕東宮愍楚彥博同直內史游秦彥將皆典祕閣是彥博彥將皆以彥配名惟大雅異。復考大雅撰唐創業起居注書隋煬帝遣使夜至太原溫彥將宿于城西門樓上首先見之報兄彥弘馳以啓帝帝方臥聞而驚起執彥弘手據此則溫氏昆弟皆以彥爲名明矣。而此書首題大雅奉敕撰又顏碑有云大雅其故何耶。蓋唐之孝敬皇帝諱弘如徐有功本名弘敏緣避諱遂以字行大雅

生在孝敬之前。後追改之。故稱其字爲名。如晉書不云劉淵而云劉元海。不云石虎而云石季龍也。

宰相世系表二下

褚氏。宋共公子段。字子石。食采於褚。其德可師。號曰褚師。此俗生傳會之詞。不足信。褚師當是以官

爲氏。鄭公孫黑請以印爲褚師。杜預云。褚師。市官是也。衛有褚師聲子。則褚師一官。宋衛鄭皆有之。

漢梁御史中丞中書侍郎。南史。漢作潁。褚亮傳作湮。未知誰是。

象。太子舍人。舊書褚亮傳。象作蒙。子見褚亮碑。石刻正作蒙。則象爲誤文也。

崔氏。仁師。相太宗高宗。案宰相表。貞觀二十二年正月。中書舍人崔仁師。爲中書侍郎。參知機務。二

月。除名。流連州。自後未有入相之事。本傳但云永徽初。授簡州刺史而已。此表高宗二字。衍文也。

宰相二十三人。鄭州有元綜。鄴陵有知溫。南祖有昭緯。慎由。允。警。神基。清河大房有龜從。小房有彥昭。羣。

鄆。青州房有圓。安平房有仁師。湜。博陵大房有玄暉。損。鉉。元式。第二房有珙。遠。祐甫。植。第三房有日用。

案表。博陵大房有沆。字內融。相僖宗。博陵二房有安上。字敦禮。相高宗。造。字玄宰。相德宗。皆失舉其

目。又玄暉孫渙明。皇西狩。拜門下侍郎。同中書門下平章事。表但云門下侍郎。不云相。玄宗亦誤也。崔

氏宰相實二十七人。

宰相世系表三上

韓氏。宰相四人。瑗休滉弘。案韓滉傳。滉爲浙江東西觀察使。鎮海軍節度使。貞元元年。加檢校左僕射。同中書門下平章事。江淮轉運使。宰相表不列滉名。而本紀亦不言加滉平章事。蓋方鎮加宰相。不得爲眞宰相也。韓氏宰相。但可云三人。不當以滉充數。

任氏。宰相一人。雅相。案宰相表。有任知古。相武后。

宰相世系表三下

上官氏。楚王子蘭爲上官大夫。以族爲氏。案史記。上官大夫乃靳尚。非令尹子蘭。

樂氏。樂呂。孫喜。喜生司城子罕。據左氏傳。子罕。卽樂喜字。表誤以爲二人。

孫氏。宰相二人。清河有茂道。武邑有偃。案宰相表。有孫元亨。相武后。

趙氏。宰相四人。仁本。愷。彥昭。宗儒。案宰相表。有趙隱。相懿宗。

宰相世系表四上

韋氏。月將以直諫死中宗朝。案世系表之例。書官位不書事狀。而韋月將以直諫死中宗朝。崔泰之

以職方郎中。預平二張。崔諤之以商州司馬。預平韋后。功第二。盧鼎與起居郎蘇楷。羅袞。請改昭宗諡曰襄。此四事者。特書于表。雖寓褒貶之旨。然一代忠姦。當褒貶者。不獨此四人。且月將事已見武三思。尹思貞。宋璟傳。泰之。諤之。見其父知溫傳。蘇楷請改諡事。亦見昭宗紀。加增盧鼎。羅袞二人名於紀中。

則此文皆可刪也。崔瑒相黃巢。此何足齒及。而表亦書之。若云以此示貶。則唐臣之仕于安史泚巢者不少矣。獨書瑒一人。亦非例也。崔瑒。鄆之子。其相賊事。當附見鄆傳。唐彥謙。號鹿門先生。不書於本傳。而書於表。亦失史法。

宰相十四人。平齊公房有保衡。弘敏。東眷有方質。逍遙公房有貫之。處厚。侍價。鄆公房有巨源。南皮公房有見素。駙馬房有溫。龍門公房有執誼。襄陽當云小道有思謙。嗣立。京兆有貽範。昭度。據表。鄆公房尚有安石。相武后中。宗睿宗。小逍遙公房尚有承慶。相武后。實十六人。又宰相表有韋琮。相宣宗。此表失載。

郭氏。平王東遷。奪虢叔之地與鄭武公。楚莊王起陸渾之師伐周。責王滅虢。於是平王求虢叔裔孫序。封於陽曲。號曰郭公。案。楚莊不與平王同時。春秋。莊公二十四年。郭公。公羊以爲失地之君。則其時郭已亡矣。楚莊伐陸渾之戎。又在其後六十九年。

武氏。攸宜。冬官尙書。外戚傳。終右羽林大將軍。與表異。武氏子弟封王者。惟攸歸。攸止。載德。三人先死。不及削封。故表著之。餘皆書所降之封。於例當矣。乃攸宜自建安王降息國公。攸緒自安平王降巢國公。攸寧自建昌王降江國公。表并公爵亦不書。重規已降封鄆國公矣。而表仍書高平王。懿宗已降封耿國公矣。而表仍書河閒王。當作河內。崇訓已降封鎬國公矣。而表仍書高陽王。延義已降封魏國公。

矣。而表仍書嗣魏王。此又義例之自相違反者也。

攸望少府監蔡公。案外戚傳降封葉國公。舊唐書作鄴國。

嗣宗蒲州刺史管公。外戚傳終司衛卿。

延祚光祿少卿鄒公。案舊書外戚傳延祚本咸安郡王降封咸安郡公。與此互異。且新舊傳並云重規降封鄒國。而表屬之延祚。恐誤。

宰相五人。攸暨攸寧、元衡、三思、承嗣。宰相表又有武什方。相武后。吳氏糾謬書。譏其脫漏。以予考之。什方本韋氏。賜姓武。表雖不書。未爲大失。但本表元有兩例。李世勣本徐氏。表從徐氏。不從李氏。此一例也。元載本景氏。表不別出景氏。而于元氏世系之後云。大歷宰相元載。本景氏。故不著。又一例也。此什方者。既不入韋氏。又不附書武氏之後。於例亦未當也。

宰相世系表四下

豆盧氏。魯元。後魏太保襄城公。案魏書。盧魯元。昌黎徒河人。曾祖副鳩。仕慕容垂。爲尙書令臨澤公。祖。父並至大官。不言慕容氏之族。且是盧氏。非豆盧氏。故沈炳震極詆此表之謬。今檢表。稱慕容廆弟西平王運。生尙書令臨澤敬侯制。制生右衛將軍北地懿王精。降後魏。北人謂歸義爲豆盧。因以爲氏。二子醜。勝。勝子魯元。是尙書令臨澤敬侯制。乃魯元之曾祖也。制與副。字形相似。官與封號又同。唯公

侯字小異。明是一人。表但脫去鳩字耳。慕容出於徒河。而魯元亦稱昌黎徒河人。其爲慕容之支庶。亦無可疑。魏初改姓豆盧。猶之改禿髮爲源氏。其單稱盧者。必是孝文遷洛時。改代北複姓。因去豆存盧。故魏收修史仍之也。宇文泰據關中。悉復代北氏族之舊。故豆盧寧仍稱本氏。沈氏謂魯元自姓盧氏。與豆盧絕不相蒙。斯不然矣。晉書後燕載記。稱慕容麟以兵劫北地王精。謀率禁旅弑主。精以義距之。麟怒殺精。是精無降魏之事。北史豆盧寧傳云。燕北地王精之後。高祖勝以皇始初歸魏。賜姓豆盧氏。蓋得其實。又據北史寧父萇。是勝之曾孫。而表以萇爲醜之孫。疑亦當從傳也。

豆盧氏宰相一人。欽望。案宰相表有豆盧瑑。相懿宗。

朱氏。宰相一人。敬則。案宰相表有朱朴。相昭宗。

宰相世系表五上

鄭氏。曄。生中書博士茂。一名小白。七子。白麟。嗣伯。叔夜。洞林。歸藏。連山。幼麟。因號七房。鄭氏大房白麟。後絕。第三房叔夜。後無聞。案魏書鄭羲。字幼麟。麟即幼父曄。生六子。羲五兄。長曰麟。次小白。次洞林。次叔夜。次連山。元和姓纂。曄生七子。曰白麟。小白。叔夜。洞林。歸藏。連山。幼麟。號七房。鄭氏魏書不及歸藏。意其後早絕故乎。唐表所載七子。惟嗣伯乃小白之子。其餘六人。乃小白昆弟。而表俱以爲小白子。誤矣。白麟有孫道慄。爲隨郡太守。叔夜子孫亦多顯者。表一以爲絕。一以爲無聞。似未可信。

宰相九人。北祖有珣、瑜、覃、朗、餘慶、從讓、延昌。南祖有綱、榮、陽、有暉、滄州有悛。案宰相表有鄭肅、相武宗、鄭鑿、相昭宗。吳氏糾謬數世系表脫漏者。惟舉鑿不及肅。亦考之未審也。

宰相世系表五下

渾氏。潭、隋左玉鈐衛大將軍。案回紇傳。太宗以阿貪支爲有領軍衛大將軍。皋蘭州刺史。阿貪支死。

子回貴嗣。回與迴同此表云潭者。卽阿貪支也。貪潭音相似。阿貪支受官於太宗時。表不書唐官。而書隋官。

亦非是。

元慶、鎮國大將軍、檢校禮部尙書。案回紇傳。回貴死。子大壽嗣。表以元慶爲迴貴子。大壽爲元慶子。多

元慶一世。考路巖撰渾侁神道碑。敘其先世。正與表同。則回紇傳誤也。

鎬、義武軍節度使。案鎬之子侁。字復貴。咸通初爲義昌軍節度使。路巖撰神道碑。載文苑英華。表何以

失書。

獨孤氏。出自劉氏。後漢世祖生沛獻王輔。輔生釐王定。定生節王丐。後漢書作正丐子廙。洛陽令。生穆。穆生

度。遼將軍。進伯。擊匈奴兵。敗被執。囚之孤山下。生尸利。單于以爲谷蠡王。號獨孤部。尸利生烏利。二子。

去卑。猛。沈炳震曰。河南劉氏世系云。漢高祖以宗女妻冒頓。其族貴者皆從母姓。因爲劉氏。左賢王

去卑裔孫庫仁。爲南部大人。此又以去卑爲沛獻王之後。未詳何據。大昕案。魏書匈奴劉聰傳。晉書劉

元海載記俱云以母姓爲氏。且匈奴左右賢王皆以子弟爲之。去卑旣爲右賢王。魏書鐵弗劉武傳作左賢王。必係近族。此表云出於沛獻王者。妄也。據魏書劉武傳稱左賢王去卑之孫。北部帥劉猛之從子。則猛當是去卑子。表以去卑與猛爲昆弟。亦非也。魏書官氏志載神玄皇帝時。餘部諸姓內入者。有獨孤氏。後改爲劉氏。周書獨孤信傳。其先伏留屯者爲部落大人。與魏俱起。是獨孤與匈奴非一種。不當牽混爲之。雞田李氏。本河南部落稽阿跌之族。至光進。賜姓李。案此表述世系甚略。良臣之先世與光進。光顏之子。表皆失載。今考良臣神道碑。稱大父賀之。貞觀初。率部落來歸。授雞田州刺史。父延豐。襲雞田州刺史。以功加開府儀同三司。良臣襲刺史。肅宗立靈武。率所部馳詣行在。戰有功。進開府儀同三司。朔方先鋒左肋兵馬使。贈太保。生三子。長光玘。朔方都將。次光進。次光顏。又光進碑云。嗣子季元。河東衙前兵馬使。檢校太子賓客。次燧元。陳許節度押衙。檢校太子賓客。次毅元。太原尉。次宗元。次吉元。光顏碑云。嗣子昌元。鄜坊丹延節度使。檢校戶部尚書。次扶元。左龍武軍大將軍。次繼元。太常主簿。次誠元。湖州司馬。次建元。河東節度右都押衙。檢校國子祭酒。次興元。衢王友。次榮元。右羽林軍統軍。檢校左散騎常侍。次奉元。清源丞。次播元。河東節度押衙。左門槍兵馬使。次安元。右軍先鋒兵馬使。檢校右驍衛將軍。則李氏五世譜牒。犁然可考。故史家不可以不博聞也。

廿二史考異卷五十一

唐書十一

后妃傳

文德皇后長孫氏。父晟，字季。隋書及宰相世系表作季晟。

則天皇后武氏。始士護娶相里氏，生子元慶、元爽。又娶楊氏，生三女。伯嫁賀蘭越石，早寡，封韓國夫人。

仲卽后，季嫁郭孝慎，前死。楊以后故寵日盛，徙封榮國。始兄子惟良、懷運。當云士護兄子與元慶等遇楊及后

禮薄，后銜不置。及是，元慶爲宗正少卿，元爽少府少監，惟良司衛少卿，懷運淄州刺史。它日夫人置酒

酣，謂惟良曰：「若等記疇日事乎？」今謂何？對曰：「幸以功臣子位朝廷，晚緣戚屬進，憂而不榮也。」夫人怒，諷

后僞爲退讓，請惟良等外遷，無示天下私。由是惟良爲始州刺史，元慶龍州，元爽濠州，俄坐事死。振州

元慶至州憂死。韓國出入禁中，一女國姝，帝皆寵之。韓國卒，女封魏國夫人，欲以備嬪職，難於后，未決。

后內忌甚，會封泰山，惟良、懷運以岳牧來集，從還京師，后毒殺魏國，歸罪惟良等，盡殺之。氏曰螽，以韓

國子敏之奉士護祀。初，魏國卒，敏之入弔，帝爲慟，敏之哭不對。后曰：「兒疑我惡之，俄貶死。」楊氏徙鄴，衛

二國咸亨元年卒。案外戚傳，始士護娶相里氏，生子元慶、元爽，又娶楊氏，生三女。元女妻賀蘭氏，早

寡季女妻郭氏。不顯。士護卒後。諸子事楊不盡禮。銜之。后立。封楊代國夫人。進爲榮國。后姊韓國夫人。於時元慶已官宗正少卿。元爽少府少監。兄子惟良。衛尉少卿。楊諷后上疏。出元慶等於外。以示退讓。由是元慶斥龍州。元爽濠州。惟良始州。元慶死。元爽流振州。乾封時。惟良及弟淄州刺史懷運。與岳牧集泰山下。於是韓國有女在宮中。帝尤愛幸。后欲并殺之。卽導帝幸其母所。惟良等上食。后寘堇焉。賀蘭食之暴死。后歸罪惟良等。誅之。諷有司改姓蝮氏。絕屬籍。元爽緣坐死。家屬投嶺外。后取賀蘭敏之爲士護後。賜氏武。襲封。擢累左侍極。蘭臺太史令。敏之韶秀自喜。烝於榮國。挾所愛佻橫多過失。榮國卒。后出珍幣建佛廬。徼福。敏之乾匿自用云云。后疊數怒。至此暴其惡。流雷州。表復故姓。道中自經死。二傳之文大略相同。后妃傳稱楊氏由榮國夫人徙鄴衛二國。外戚傳但稱榮國。不云徙封。其不同一也。外戚傳元爽以惟良事緣坐死。后妃傳先云元爽坐事死。振州。後及后毒殺魏國事。似元爽別坐他事誅。其不同二也。據外戚傳。賀蘭敏之死。在楊氏卒之後。后妃傳。敏之死在楊氏卒之前。魏國卒于乾亨改元前四年。此傳云。敏之死。則爲時未久。不得遲至四載。其不同三也。外戚傳。后取賀蘭敏之爲士護後。當云韓國子。而不書者。漏也。惟良懷運。皆士護兄子。讓之子。兩傳但稱兄子。則嫌於后之兄子。亦漏也。后妃傳。一云夫人置酒。酣。再云夫人怒。以上文考之。后母由代國夫人徙封榮國。后姊亦封韓國夫人。當書姓。或書封號。以別之。不當但稱夫人也。

敬業南度江取潤州殺刺史李思文。曲阿令尹元貞戰死。元貞，河間人。贈潤州刺史。諡曰壯。舊史入忠義傳。

前鋒左豹韜果毅成三朗，爲唐之奇所殺。三朗，幽州人。贈左監門將軍。諡曰勇。舊史入忠義傳。三朗，舊史作郎。蓋宋人避諱缺筆。書朗爲朗，因譌爲郎耳。

春官尙書李思文。此又一思文。

尊周文王爲文皇帝。號始祖妣曰文定皇后。武王爲康皇帝。號睿祖妣姜曰康惠皇后。案武后紀追尊四十代祖平王少子武曰睿祖康皇帝。妣姜曰康惠皇后。非武王也。吳氏糾謬。但云二說不同。今斷以傳爲誤。

玄宗貴妃楊氏。於是嶺南節度使張九章。案方鎮表。至德元載。始置嶺南節度使。此時似無節度之名。

章敬皇后吳氏。負姆嫌陋。更取它宮兒以進。此事舊史所無。新史采柳氏舊聞增入。其實無稽之談也。唐會要。代宗以開元十四年十月十三日生。其時肅宗未爲皇太子。

宗室傳

畢王璋生二子。曰詔。曰孝基。案世系表。以孝基入畢王房。詔入雍王房。又於永安壯王孝基下云。嗣王

道立以雍王繪男詔次子高平公繼。則詔非畢王子明矣。

永安壯王孝基曾孫涵。贈太子太保。唐會要諡曰玄。

雍王繪子贄。追爵河南王。唐會要贈禮部尚書。諡曰德。宗室世系表作長平王。

淮南壯王道玄。宗室世系表及會要俱云淮陽王。此云淮南。恐誤。傳云壯王。而會要作忠。未詳孰是。

長平肅王叔良。唐會要叔良諡兩見。一云贈左衛大將軍。曰肅。一云贈太子太保。諡曰靖。蓋傳聞異

詞。

仁杲內史令翟長孫。仁杲傳作長孫。

長樂郡王幼良六世孫。回別傳。案回傳云新興王德良六世孫。世系表又別於長平王叔良下。

襄武郡王琛。字仲寶。世系表作惟寶。

河間元王孝恭子崇義晦。世系表晦上亦有崇字。

淮安靖王神通十一子。得王者七人。道彥、孝訢、孝同、孝慈、孝友、孝節、孝義。案本傳道彥封膠東王。孝訢

高密王。舊書作孝察。孝同淄川王。孝慈廣平王。孝友河間王。孝節清河王。孝義膠西王。後皆降封公。世系表

孝友止稱尚書左丞。無封號。其封河間郡公者。乃孝本也。未知孰是。

孝銳不得封。有子齊物顯。世系表孝銳子恆農太守瓌。瓌子刑部尚書齊物。則齊物乃孝銳之孫。

孝節曾孫鬲。案世系表鬲乃孝節之孫。

世祖四子長曰澄次洪次高祖神堯皇帝。世系表代祖即世祖四子長高祖次梁王澄次蜀王洪次

漢王洪與傳互異。

梁王澄蚤薨無嗣。世系表梁王澄子有彭城王士衍江東郡王世證衡山郡王世訓三人又以蜀王第

二子博又繼豈諸子薨絕而後以博又嗣之乎然澄既有三子不得云蚤薨矣博又傳亦不言出繼梁王事蓋表傳之文多不相應。

高祖諸子傳

衛懷王玄霸以宗室西平王瓊子保定嗣。世系表作平原王瓊。

鄭惠王元懿十子長子璈嗣王爲鄂州刺史。案世系表元懿止九子無名璈者嗣王乃遂州刺史璜也。

武后紀亦稱嗣鄭王璈。

號莊王鳳中宗以鳳孫邕嗣王。唐會要邕贈荊州大都督諡曰景。

嗣魯王道堅薨贈禮部尙書。唐會要諡曰忠。

弟道邃封戴國公。弟上脫道堅二字。

太宗諸子傳

嗣吳王曦薨，贈太子少保。唐會要諡曰恭。

三宗諸子傳

詔外繼嗣王者皆歸宗，乃以嗣江王禕爲信安王，嗣蜀王禕爲廣漢王，嗣密王徹爲濮陽王，嗣曹王臻爲濟國公。案曹王明傳，神龍初，以傑子胤爲嗣曹王後，改封傑弟備，備薨，復封胤，胤薨，子戡嗣，中間不容更有臻嗣王爵。世系表備作脩。

十一宗諸子傳

越王係，至德二載十二月，進王趙，與彭、兗、涇、鄆、襄、杞、召、興定九王同封。案肅宗紀，與係同時封王者八人，彭、兗、涇皆由郡王進封，襄、杞、召、興定皆始封，無鄆王名，又以衛王倓、鄆王榮兩傳考之，則鄆王始封靈昌郡王，早薨，寶應元年，與倓同追封，非至德中封也。

襄王儻子寀樂安王。案敬宗子執中亦封襄王，其子寀封樂平郡王，兩襄王之子俱名寀，而封號相似，亦可疑也。

敬宗第二子休復，文宗開成二年，封梁王，第三子執中爲襄王，第四子言揚爲紀王，以諸傳例之，當云梁王休復，襄王執中，紀王言揚，各自跳行，不應附於悼懷之末。

宣宗十一子，元昭太后生懿宗皇帝，傳兼懿宗言之，當云十二子，宗室世系亦作十一子，俱誤。

靖懷太子漢會昌六年始王雍與夔慶二王同封雅王涇大中元年始王案宣宗紀會昌六年四月辛

酉封子溫爲郾王漢雍王涇雅王滋夔王沂慶王同時封王者五人郾王卽懿宗故傳不及之漢當爲

漢字之譌也通鑑亦作漢音美雅王涇之封紀以爲會昌六年傳以爲大中元年疑傳誤舊唐書本紀郾雅夔

年四月封而無雍王夔卽夔也

通王滋會昌六年王夔與慶王沂同封懿宗立滋徙王昭宗乾寧三年領侍衛諸軍案滋與慶王同封

已見靖懷太子傳而本傳又及之此文之重複猶其失之小者考懿宗紀咸通四年八月夔王滋薨則

滋薨懿宗朝初未改封通王安得於昭宗朝領軍爲韓建所害乎建所殺之通王蓋別是一人而新史

強合之妄之甚矣德宗子有通王諶意建所殺者諶之後嗣王乎舊史昭宗紀不載通王名

濟韶彭韓沂陳延覃丹九王史逸其系胄云案彭王愓憲宗子沂王禮昭宗子皆見本卷吳縝已糾之

矣然昭宗子冲孺未握兵柄何至爲韓建所忌且禮在彛弟中次居第四使建欲害諸皇子又不應舍

長而及幼此理之必不然者舊史昭宗紀有儀王無沂王疑沂乃儀之譌新紀作沂王禮又史家妄益

之也通鑑考異云順宗子經封郟王會昌後避武宗諱改郟作覃則嗣覃王嗣周當是經之後予謂嗣

丹王允當是代宗子丹王逾之後嗣延王戒不當是玄宗子延王玢之後嗣韓王當是高祖子韓王元

嘉之後元嘉之後改封郾懿宗以郾王卽位復其故名玄宗子有濟王環代宗子有韶王暹敬宗子有陳王成美此濟韶陳三

王疑亦嗣王也。

諸公主傳

高祖女高密公主。下嫁段綸。綸爲工部尙書杞國公。唐會要紀國公段綸。諡曰安。紀杞字形相涉未知孰是。

太宗女臨川公主。下嫁周道務。道務殿中少監。譙郡公範之子。唐會要範贈工部尙書。諡曰敬。

高宗女太平公主。神龍時與長寧安樂宜城新都定安金城凡七公主。皆開府置官屬。案長寧安樂宜

城新都定安皆中宗女。太平則高宗女也。神龍朝公主別無封金城者。惟高宗女高安公主始封宣城。

神龍初進册長公主。實封千戶。開府置官屬。此金城或宣城之誤。

主三子崇簡崇敏崇行皆拜三品。案薛紹子崇簡武攸暨子崇敏崇行當加姓以別之。

睿宗女玉真公主始封崇昌縣主。本封隆昌。史家避明皇諱追改。

玄宗二十九女。自永穆至壽安實三十人。吳氏糾其自相違舛。今考唐會要載明皇二十八女。永穆降王

繇降張常芬去奢孝昌早薨靈昌早薨常山降薛譚又唐昌降薛萬安入道寧親降張上仙早薨新昌降蕭高都降裴

臨晉降鄭建平降豆盧達後降貞陽降源清後信成降孤獨宜春早薨壽春降吳澄後入昌樂降寶永寧降

齊平昌降溫西華後降楊徽蘇明太華降楊興信本封高陽後降裴壽光降郭樂成降薛新平

降裴玲後廣寧降程昌裔咸宜降楊泗後萬春降楊史合寧親與興信爲一人又多懷思普康壽安三

降姜慶初

人子謂公主早薨者多矣。獨普康公主以明皇女而追封于咸通之世，殊不近情。又考懿宗八女，自有封普康者，乃悟咸通九年追封者，必是懿宗之女。史家轉寫，重複錯亂，若於明皇諸女中，除去普康一人，則與二十九人之數合矣。

臨晉公主下嫁郭潛曜。郭當爲鄭字之譌。潛曜，駙馬都尉萬鈞之子。

衛國公主始封建平，下嫁豆盧建。唐會要作豆盧達，予謂建平主塔，不當名建，恐當以達爲正也。衛國

會要作衡國。

貞陽公主下嫁源清，又嫁蘇震。案蘇誥子震，官至太常卿，彼傳不云尙公主，未審卽其入否也。

廣寧公主下嫁程昌胤。后妃傳作昌裔，蓋宋人避太祖諱，改胤爲裔。會要亦作裔。

壽昌公主下嫁郭液。會要作壽光。

順宗女西河公主下嫁沈翬。案郭子儀傳，孫銛尙西河公主，又云初西河主降沈氏，銛無子，以沈氏子

嗣。此傳不書改適郭銛，漏也。

宣宗女廣德公主下嫁于琮。初琮尙永福公主，主與帝食，怒折匕筯，帝曰：此可爲士人妻乎？更許琮尙主。

永福主折筯事，又見于琮傳，宜刪彼此。

昭宗女永明公主蚤薨。當云薨天祐時。舊本紀在天祐三年七月。

廿二史考異卷五十一

唐書十二

蕭銑傳

若銑力困計殫。以好言自釋於下。係虜在廷。抗辭不屈。僞辯易窮。卒以殊死。高祖聖矣哉。案蕭銑、梁之後裔。爲衆所推。非有失德。及唐兵深入。自揣勢力弗若。不惜生降。以全民命。其答高祖以田橫自比。蓋道其實耳。高祖自慮養虎貽患。故亟除之。如李密、王世充之徒。雖低首屈服。終亦不免。視宋祖之待劉鋹。有媿色矣。以是爲聖。未之前聞。

輔公祐傳

遂僭位國稱宋。唐初羣雄割據。自立年號。皆書於本傳。惟公祐傳不言年號。蓋史之闕也。楊文公談苑。記江南保大中浚秦淮。得石志。案其刻有大宋乾德四年字。令諸儒參驗。乃輔公祐反江東時年號。然新舊書通鑑皆未及載。萬斯同紀元彙考。謂公祐紀元天明。與楊氏談苑又異。

劉思禮傳

少學相人於張憬藏。憬藏謂思禮歷刺史。位至太師。案舊唐書。思禮少嘗學相術于張憬藏。相己必歷

刺史位至太師。揆其文義，謂思禮自相當得太師，非憬藏許之也。新史改竄，失其本旨。

李安遠傳

累封至廣德郡公。石刻武德四年秦王告少林寺教，有德廣郡開國公安遠名，卽李安遠也。傳作廣德郡誤。

段志玄傳

齊州臨淄人。神道碑作鄒平。

諡曰壯肅。當作忠壯。舊史本傳。唐會要及神道碑，並作忠壯。獨此云壯肅，字之譌也。

殷開山傳

祖不害。仕陳爲司農卿。案殷踐猷傳稱陳給事中不害。

劉崇魯傳

景福中以水部郎中知制誥。雅與崔昭緯善。帝以韋昭度、李磻輔政，昭緯懼見奪，共謀沮之。及磻墨麻出，崇魯輒掠麻大哭。帝問焉。崇魯曰：「今雖乏人，豈宜取儉人爲宰相？磻以楊復恭、西門重遂得近職，奈何用之？前日杜讓能羞戮未刷，尙忍蹈覆轍乎？磻由是不得用，磻亦劾奏其姦，因自陳爲山南楊守亮，詆毀不容與復恭交私。又言崇魯爲宰相，使親吏日夕謁左軍，與復恭相親厚，絕巾慘帶，不入禁門。崇魯

向殿哭。厭詛天祚。殆人之妖。且其父坐賄飲藥死。崇魯身爲朱玫史官。作勸進表。在太原府使西川。見田令孜沒階趨廢制度。自崇魯始。其相詈訾。俚淺稽校。譬市人然。此事又見李磻傳。此詳而彼略。彼傳載崇魯言。又有磻弟爲時溥所殺一事。蓋挾方鎮以恐惕朝廷。故引杜讓能爲誠。此傳不言時溥事。則讓能覆轍之語。全無著矣。

許紹傳

子智仁。終涼州都督。唐會要。智仁官懷州刺史。孝昌縣男。諡曰敬。

許圜師傳

進戶部尚書。卒。唐會要。圜師封平恩縣公。舊史作平恩縣男。

溫大雅傳

諡曰孝。唐會要。作景。

溫彥博傳

突利可汗弟。結社謀反。案。太宗紀。魏徵突厥兩傳。俱作結社率。此脫率字。

彥博裔孫廷筠。弟廷皓。宰相世系表。失載廷筠。廷皓二人。

李子和傳

進金紫光祿大夫。唐會要贈靈州都督諡曰德。

李勣傳

勣子震嗣終桂州刺史。唐會要有梓州刺史李震諡曰定疑卽勣子也。

薛萬均傳

帝震悼爲舉哀。唐會要萬均贈幽州都督諡曰景。

高士廉傳

高儉字士廉以字顯。宰相世系表作宗儉。

竇抗傳

贈并州都督。唐會要諡曰肅。

竇德玄傳

威從孫德玄。案宰相世系表竇略五子興拔岳善熾岳之子毅熾之子威威與毅爲從兄弟德玄爲毅之曾孫則威之從曾孫矣。

房玄齡傳

玄齡字喬。宰相世系表作喬松。

杜元穎傳

如晦五世孫元穎。案宰相世系表元穎乃淹之六世孫。舊唐書杜審權傳云如晦六代孫審權爲元穎從子。與此傳合。

魏徵傳

帝將以衡山公主降其子叔玉。案公主傳太宗二十一女無封衡山者。考于志寧傳云衡山公主既公除將下嫁長孫氏。則是衡山停婚魏氏後許嫁長孫矣。公主傳下嫁長孫氏者有新興新城兩公主。未審何人初封衡山也。

薛收傳

永徽中又贈太常卿。收諡曰獻。收子元超諡曰懿文。見唐會要。

薛稷傳

道衡曾孫。據宰相世系表乃四世孫。

馬周傳

追贈尚書左僕射。唐會要贈尚書左僕射諡曰忠。

韋挺傳

慶州刺史楊文幹坐大逆誅。辭連東宮。帝專責宮臣。由是挺與杜淹、王珪等皆流越巂。案杜淹傳亦云。慶州總管楊文幹反。辭連太子。歸咎淹及王珪。韋挺並流越巂。文既重出。以事考之。亦未核。王珪、韋挺皆建成東宮官。杜淹則秦王府官也。文幹反。辭連東宮。珪挺固宜獲咎。於淹何預。而同貶斥乎。考隱太子建成傳云。華陰楊文幹素凶詖。建成昵之。使爲慶州總管。遣募兵送京師。欲爲變。文幹遽率兵反。帝以建成首謀。未忍治。卽詔捕王珪、魏徵及左衛率韋挺等。欲殺之。以薄建成罪。會文幹陷寧州。帝召秦王問計。對曰。文幹豎子耳。官司當卽禽之。帝曰。事連建成。恐應者衆。爾自行。還吾以爾爲太子。使建成王蜀。蜀地狹。不足爲變。若不能事汝。取之易也。秦王率衆趣寧州。文幹爲其下所殺。以首降。秦王之行。元吉及內嬖。更爲建成請。帝意解。復詔建成居守。但責兄弟不相容。而謫王珪、韋挺。天策兵曹參軍杜淹于遠方。是珪挺淹三人之謫。乃坐構釁太子秦王。而非以文幹事得罪也。王珪傳稱太子與秦王有隙。帝責珪不能輔導太子。流嶲州。蓋得其實。

韋待價傳

流待價繡州卒。案唐會要待價扶陽郡公。謚曰元。當是身後追復本官。

韋武傳

贈吏部尙書。唐會要謚曰恭。

李大亮傳

大亮族孫迴秀。案宰相世系表當是族子。

陳叔達傳

貞觀初與蕭瑀爭殿中坐。忿諍不恭。免官。宰相表。武德九年十月。叔達瑀坐事免。非貞觀初。

楊師道傳

諡曰懿。唐會要師道諡兩見。一云懿。一云康。

楊執柔傳

乃以執柔同中書門下三品。未幾卒。唐會要執柔贈天官尚書。諡曰貞。

封倫傳

祖隆。北齊太子太保。當作隆之。史脫之字。

裴矩傳

裴矩字弘太。宰相世系表作世矩。傳避太宗諱。去世字矩。隋書有傳。入唐無大表見。雖不立傳可也。此傳首尾一千五百五十餘字。述隋事者什之七八。既與隋史重複。兼亦失於限斷。當云仕隋。至某官事。見前史。乃繼以仕宇文化及竇建德事。斯爲得之。若封倫、蕭瑀輩。舊史無傳者。固不妨述其梗概也。

閻立本傳

卒諡曰文貞。唐會要無文字。

韋弘機傳

孫岳子。岳子孫皋，別有傳。案韋皋傳，六代祖範，有勳力周隋間，不言爲弘機之後。若依此，遵率不爲弘機之玄孫，皋之六世祖，卽弘機祖也。此傳云祖元禮，隋浙州刺史。浙當作浙不名範，兩傳必有異。州又此傳。岳子乃兩字名，而舊史良吏傳單稱岳，亦未知誰是。

蕭瑀傳

久之，遷左僕射。貞觀初，房玄齡、杜如晦新得君，事任稍分。瑀不能無少望，乘罅切詆，辭旨疏躁。太宗怒，廢于家。俄拜特進、太子少師，復爲左僕射，坐與陳叔達忿爭，御前不恭，免。歲餘，起爲晉州都督，入拜太常卿。遷御史大夫，參預朝政。會玄齡等小過失，瑀卽痛劾，不報。由是自失，罷爲太子少傅，加特進，復爲太常卿。九年，復參預政事。晉王爲皇太子，拜太子太保、同中書門下三品。瑀中狹，每燕見，輒言玄齡輩朋黨盜權，帝積久亦不平。瑀好浮屠法，閒請捨家爲桑門，帝許之矣。復奏自度不能爲，又足疾不入謁，詔奪爵，下除商州刺史。今以宰相表考之，瑀五入相而五罷。武德元年，由隋民部尚書爲內史令。六年，遷尚書右僕射。九年，轉左僕射。其年十月，與陳叔達俱坐事免。此一罷也。貞觀元年六月，由太子少師

爲尙書左僕射。其年十二月罷。此再罷也。四年二月。復以御史大夫參議朝政。其年七月。罷爲太子少傅。此三罷也。九年十一月。復以特進多預朝政。十年十二月。罷爲岐州刺史。此四罷也。十七年四月。又以特進太子太保同中書門下三品。二十年十月。貶商州刺史。此五罷也。傳於貞觀十年。罷相一節。略而不書。其與陳叔達忿爭免官。乃在武德九年。太宗雖已卽位。猶未改元。而誤以爲貞觀初。其誤與陳叔達傳同。且係第一次罷相。而誤以爲第二次。皆自相抵牾也。

蕭嗣業傳

擢累鴻臚卿。兼單于都護府長史。龍朔元年。嗣業爲扶餘道行軍總管。伐高麗。又爲仙巒道行軍大總管。代鐵勒。傳皆失書。

蕭定傳

遷袁潤等六州刺史。大厯中有司差天下刺史治最。定與常州蕭復。豪州張鎰爲第一。案蕭復傳。但云歷欽池二州刺史。治狀應條遷湖南觀察使。改同州刺史。不云爲常州刺史者。闕也。復定二人。並附瑀傳末。而前後不相應如此。

褚亮傳

諡曰康。唐會要亮諡兩見。一云康。一云文康。未詳其審。

姚班傳

班著紹訓以發明舊義云。案藝文志有姚斑漢書紹訓四十卷。卽此書也。班斑字形相涉。或宋初避諱。斑字缺末筆。後人誤認爲班耳。

令狐德棻傳

父熙。隋鴻臚卿。宰相世系表。隋吏部尚書武康公。考隋書。熙嘗任鴻臚卿。又以本官兼吏部尚書判五曹尚書事。後終於桂州總管。史稱鴻臚卿者。當時以京職爲重。吏部未正授。故亦不書也。

累進爵彭城縣子。彭城當作彭陽。傳寫之譌也。北史敘傳稱德棻爲彭陽公。德棻大父整亦封彭陽公。會修晉家史。房玄齡奏起之。預東凡十有八人。案藝文志。修晉書者。房玄齡、褚遂良、許敬宗、來濟、陸元仕、劉子翼、令狐德棻、李義府、薛元超、上官儀、崔行功、李淳風、辛邱馭、劉引之、陽仁卿、李延壽、張文恭、敬播、李安期、李懷儼、趙弘智等。自房相外。蓋不止十八人也。

顧允傳

中子琮。武后時爲天官侍郎。同鳳閣鸞臺平章事。唐會要。贈越州都督。渭源縣侯。諡曰靖。

于志寧傳

志寧與司空李勣。修定本草并圖。合五十四篇。卽所謂顯慶本草也。藝文志載撰述人。無志寧名。

張易之傳

時無檢輕薄者。又諂言昌宗乃王子晉後身。據外戚傳。乃武三思倡言。

乃詔昌宗卽禁中論著。引李嶠、張說、宋之問、富嘉謨、徐彥伯等二十有六人。撰三教珠英。案藝文志三教珠英一千三百卷。張昌宗、李嶠、崔湜、閻朝隱、徐彥伯、張說、沈佺期、宋之問、富嘉謨、喬品、員半千、薛曜等撰。又李適傳。武后修三教珠英書。以李嶠、張昌宗爲使。取文學士綴集。於是適與王無競、尹元凱、富嘉謨、宋之問、沈佺期、閻朝隱、劉允濟在選。又徐堅傳。與徐彥伯、劉知幾、張說、與修三教珠英。時張昌宗、李嶠、總領彌年不下筆。堅與說專意撰綜。條彙相立。諸儒因之。乃成書。此四處重出。而人數多寡同異各殊。所當刪併以歸於一也。

長孫无忌傳

太子承乾廢。立晉王。以无忌爲太子太師。同中書門下三品。同三品自此始。案太宗紀。貞觀十七年四月。立晉王治爲皇太子。特進蕭瑀爲太子太保。李勣爲太子詹事。同中書門下三品。宰相表亦止載蕭瑀、李勣二人。其時无忌爲太子太師。房喬爲太子太傅。紀表皆不書者。非宰相之職。例不當載也。百官志。其後李勣以太子詹事。同中書門下三品。謂同侍中。中書令也。而同三品之名。蓋起于此。亦不舉无忌。然则无忌傳云。同中書門下三品者。殆誤矣。吳氏糾謬。謂宰相表有闕文。蓋考之未審。

褚遂良傳

神龍中復官爵。唐會要諡曰文忠。

韓瑗傳

父仲良。終刑部尚書。秦州都督府長史。潁川縣公。據仲良碑。貞觀十二年薨。贈兵部尚書。諡曰定。會要

以爲諡貞者誤。

神龍初。武后遺詔復官爵。唐會要諡曰貞。

來濟傳

初。濟與高智周。郝處俊。孫處約。客宣城。石仲覽家。仲覽衍于財。有器識。待四人甚厚。私相與言志。處俊曰。願宰天下。濟及智周亦然。處約曰。宰相或不可冀。願爲通事舍人足矣。後濟領吏部。處約始以瀛州書佐入調。濟遽注曰。如志。遂以處約爲通事舍人。後皆至公輔云。此事又見高志周傳。吳氏糾謬。已言其叢複矣。而容齋四筆又辨之云。此事本出韓琬所撰御史臺記。而所載自不實。處約傳。貞觀中爲齊王祐記室。祐多過失。數上書切諫。王誅。太宗得其書。擢中書舍人。是歲十七年癸卯。來濟次年亦爲中書舍人。永徽三年拜相。六年檢校吏部尚書。是歲丁巳。去癸卯首尾十五歲。若如兩傳所書。大爲不合。仲覽鄉里。一以爲宣城。一以爲江都。豈宣城人而家于廣陵也。

濟異母兄恆。上元中爲黃門侍郎、同中書門下三品。唐會要贈太子少師來恆。諡曰忠。贈潤州刺史來恆。諡曰懿。蓋一人而傳聞異詞。

崔知溫傳

子泰之。開元時爲工部尙書。諤之爲將作少匠。與誅二張功。封博陵縣侯。案宰相世系表。泰之初以職方郎中。預平二張。諤之初以商州司馬。預平韋后功第二。與此傳互異。

趙弘智傳

弘安曾孫矜。矜。舊史無傳。此采柳子厚所撰墓志添入。宋子京好退之。子厚文。故於韓傳載進學解。佛骨表。潮州謝上表。祭鱷魚文。凡四篇。藩鎮傳載平淮西碑。孝友傳載復讎議。陳京傳載禘祫議。許遠傳載張中丞傳後序。李渤傳載愈所與書。張籍傳載愈答書。甄濟傳載愈答元微之書。於柳傳載與蕭翰林俛。許京兆孟容書。貞符懲咎賦。凡四篇。孝友傳載駁復讎議。孝門銘。宗室傳載封建論。貞行傳載與何蕃書。段秀實傳亦多采宗元所撰逸事狀。舊史惟退之傳載文四篇。與新史同。餘皆子京所采也。

宜遇西人深目而髯。乃得其實。案柳子厚撰趙君墓志云。乙巳于野。宜遇西人深目而髯。其得實因。皆詭語也。史家刪改遂至失韻。

崔敦禮傳

崔敦禮字安上。宰相世系表安上字敦禮。

楊纂傳

贈幽州都督諡曰恭。唐會要恭作敬。宋人避諱。往往改敬爲恭。如楊纂柳亨輩。疑本諡敬。而後人追改也。

纂從子昉。終工部尙書。唐會要諡曰恪。

劉從一傳

贈太子太傅。唐會要諡曰敬。

傅奕傳

上疏極詆浮圖法。奕言五帝三王未有佛法。君明臣忠。年祚長久。石符亂華。主庸臣佞。政虐祚短。事佛致然。昌黎諫迎佛骨表。其說實本於此。

呂才傳

魯桓公六年七月子同生。經書九月。此據夏正。故云七月。

歲在乙亥。月建申。然則值祿空亡。乙祿在卯。丙申月。卯爲截路空亡。

又觸句絞六害。借驛馬。身剋驛馬三刑。亥與申相害。故云六害。亥卯未驛馬在巳。申在巳前爲借。巳刑

申故云三刑。月建爲身。巳火剋申金。身爲驛馬所剋也。

命火也。生當病鄉。乙亥納音火也。病于申。

唯向命一物法當壽。亥爲本命。生于申月。申在亥後。爲向命。

秦莊襄王四十八年。始皇帝生。莊襄當作昭襄。

是歲壬寅正月。命偕祿。壬祿在亥。生于寅月。在亥前。爲偕也。

又破驛馬三刑。身剋驛馬。寅午戌驛馬在申。寅破申。申刑寅。故云破驛馬三刑也。申金剋寅木。身爲驛

馬所剋也。

命金也。正月爲絕。壬寅納音金。金絕於寅。

又建命生。寅爲本命。月建在寅。是爲建命。

漢武帝以乙酉歲七月七日平旦生。當祿空亡。乙祿在卯。生于丙申月。卯爲截路空亡。

雖向驛馬。乃隔四辰。巳酉丑驛馬在亥。申至亥隔四辰。申在亥後。爲向。

後魏高祖孝文皇帝。生皇興元年八月。是歲丁未。爲偕祿命。與驛馬三刑。身剋驛馬。丁祿在午。未爲本

命。亥卯未驛馬在巳。生于酉月。在巳午未三辰之前。故皆爲背也。酉爲自刑。故云三刑。巳火剋酉金。亦

驛馬剋身也。

又生父死中。未土爲本命。生于酉月。火死於酉。火者土之父也。

宋高祖癸亥三月生。祿與命皆空亡。癸祿在子。亥爲本命。生於丙辰月。亥爲截路空亡。子爲旬中空亡。

又生子墓中。水墓于辰亥。本命屬水。納音亦屬水。生於辰月。是爲巳墓。而云子墓。所未詳也。

又生祖祿下。土爲水之祖。土以巳爲祿。生於辰月。故云祖祿下。

廿二史考異卷五十三

唐書十三

裴行儉傳

諡曰獻。唐會要作憲。

裴光廷傳

光廷字連城。神道碑作光庭。

博士孫琬以其用循資格非獎勸之誼諡曰克平。舊史無平字。

特賜諡曰忠憲。詔中書令張九齡文其碑。舊史憲作獻。考唐會要及光庭神道碑。光庭子稹墓志。孫倩神道碑皆作忠獻。則此文誤也。

裴均傳

贈司空。唐會要贈太子少保裴均。諡曰貞。

崔神慶傳

贈神慶幽州都督。唐會要贈幽州都督魏縣男崔神慶。諡曰貞。贈太子少傅魏縣子崔神慶。諡曰質。蓋

卽一人而傳聞異詞

神慶子琳。開元中與高仲舒同爲中書舍人。侍中宋璟親禮之。每所訪逮。嘗曰古事問仲舒。今事問琳。尙何疑。仲舒附忠義高叡傳。亦祇載此一事。

楊再思傳

張昌宗坐事。司刑少卿桓彥範劾免其官。昌宗訴諸朝。武后意申釋之。問宰相昌宗於國有功乎。再思曰。昌宗爲陛下治丹餌而愈。此爲有功。此事又見昌宗傳。

王璵傳

王璵者。方慶六世孫。案方慶傳在卷四十一。而璵傳乃在卷三十四。此前後之失序者。吳縝譏裴守貞。耀卿兩傳。次序失當。而於璵傳獨未及之。

執失思力傳

諡曰景。唐會要。諡曰繆。

契苾何力傳

鐵勒哥論。易勿施莫賀可汗之孫。父葛隋。末爲莫賀咄特勒。案回鶻傳云。契苾酋哥楞。自號易勿真莫賀可汗。弟莫賀咄特勒。皆有勇。莫賀咄死。子何力尙幼。率其部來歸。則何力乃哥楞弟子。非其孫也。論

楞聲相近。此傳云易勿施。彼傳云易勿真。未詳孰是。薛延陀傳亦作易勿真。

是時吐谷渾王伏允在突淪川。吐谷渾傳伏允走圖倫磧。即突淪川也。譯音無定字。

西突厥阿史那賀魯以處月、處密、姑蘇、歌邏祿、卑失五姓叛。案突厥傳賀魯居多邏斯川。統處月、處密、

姑蘇、歌邏祿、弩失畢五姓之衆。此卑失即弩失畢也。密蜜音同。歌邏祿或作葛邏祿。

諡曰毅。唐會要何力諡曰烈。

尙可孤傳

徙封馮翊郡王。食實戶一百五十。案下文又云封馮翊郡王。食實戶二百。重複不倫。當云增封戶至二

百。或中間以事削封邑而後復之。則史有脫文矣。

王珣傳

贈戶部尙書。諡曰孝。唐會要贈禮部尙書王珣。諡文孝。

薛平傳

贈太傅。唐會要諡成肅。

程務挺傳

后遣左鷹揚將軍裴紹業。即軍中斬之。唐會要務挺贈左衛將軍。諡曰烈。此傳失書。不知何時昭雪也。

韓思彥傳

事博士谷那律。律爲匪人所辱。思彥欲殺之。律不可。谷那律見儒學傳。谷姓。那律。其名也。此單稱律。似以谷那爲姓矣。

司農武惟良。擅用并州賦二百萬緡。思彥劾處死。武后爲請而免。李義府與諸武共譖思彥。出爲山陽丞。案武惟良爲司農后妃。外戚兩傳俱未及載。且惟良等旣爲武后所銜。欲置之死地。何以又請免其罪。又其時后寵雖盛。而諸武無當權者。此譖思彥者。果何人乎。

柳澤傳

曾祖亨。贈禮部尙書幽州都督。唐會要。謚曰敬。

中宗時。長寧宣城安定諸公主。安定當作定安。

唐臨傳

兄皎。終益州長史。贈太常卿。唐會要。謚曰敬。

徐有功傳

會昌中。追謚忠正。案謚法無正字。宋時避仁宗嫌名。改貞爲正。唐會要所載謚正者。皆貞也。有功之謚。亦當爲忠貞。蓋修史之時。或改或不改。其例初不畫一耳。

狄仁傑傳

后乃召見仁傑謂曰。臣反何邪。對曰。不臣反死。答掠矣。臣當作承。

今阿史那斛瑟羅皆陰山貴種。案舊史無皆字。斛瑟羅者。西突厥繼往絕可汗步真之子。阿史那其姓也。新史多一皆字。似誤以爲二人。

王方慶傳

六世孫璵。

璵傳亦云方慶六世孫。

據宰相世系表。當云五世孫。沈炳震曰。方慶以萬歲通天元年入相。璵以肅宗

乾元元年入相。相去僅六十三年。不應遽有六世孫。位至宰相。且方慶子光輔。開元中官潞州刺史。而璵傳云。開元末爲太常博士。據表。光輔卽璵之高祖。同時而仕。恐未必然。蓋肅宗時相。乃別一王璵。非方慶六世孫也。

武侯將軍田仁會。仁會傳。但云左武侯中郎將。不云將軍。

韋嗣立傳

監察御史宋務光建言。願停徵封一切附租庸輸送不納。務光疏。已詳見本傳。而此傳又及之。何其詞之贅也。

陸象先傳

時窮治忠義等黨與。當云至忠。忠上脫至字。

李日知傳

景龍初。同中書門下平章事。轉御史大夫。仍知政事。拜侍中。先天元年。罷爲刑部尚書。案。睿宗紀。宰相。表。日知以景雲元年六月。由黃門侍郎同中書門下三品。傳以爲景龍初者。誤也。傳云平章事。紀表俱作同三品。當以紀表爲正。宰相表又云。景雲二年四月。日知守侍中。其年十月。罷爲戶部尚書。傳以爲先天元年。差校一年。又以戶部爲刑部。亦誤也。其轉御史大夫。仍知政事。紀表並不載。

李懷遠傳

贈侍中。諡曰成。唐會要。贈侍中平鄉縣公李懷遠。諡曰成。又有贈侍中趙郡公李懷遠。諡曰惠。疑一人。而傳聞異詞也。

魏玄同傳

先是狄仁傑督太原運。失米萬斛。將坐誅。玄同救免。此事仁傑傳不載。

韋見素傳

見歲。至德元載。十月丙申。有星犯昴。見素言于帝曰。昴者。胡也。明年正月甲寅。祿山其殛乎。及祿山死。日月皆驗。案。肅宗紀。至德二載正月乙卯。安慶緒弑其父祿山。與見素所占差一日。又祿山傳。正月朔。祿山

朝羣臣創甚。罷是夜豬兒入帳下。以大刀斫其腹。腸潰於牀。卽死。考至德元載十月辛巳朔。日食。從此推之。次歲正月當爲庚戌朔。甲寅乙卯。乃月之五六日。而祿山傳謂死于正月朔。與紀傳皆不合。未審誰得其實。天文志不載。至德元載十月星犯昴事。非志有脫漏。則見素傳所云。傳聞不足信矣。

韋虛心傳

贈揚州大都督諡曰正。案唐會要。虛心與李綱、崔義元、王方慶、李乂輩皆諡正。正卽貞也。新史采自它書。多有未及訂正者。如徐有功之諡忠正。亦舊史所無。

白敏中傳

懿宗立。召拜司徒門下侍郎。遷平章事。遷字衍。

敬暉傳

睿宗時。追復官爵。諡曰肅愍。唐會要。元和三年。追諡張柬之爲文貞。桓彥範爲忠烈。敬暉爲貞烈。崔玄暉爲文忠。袁恕己爲貞烈。史載桓、張、袁三人諡。與會要同。惟敬暉諡肅愍。崔玄暉諡文獻。爲異。豈史所載者。乃睿宗朝所賜之諡乎。

張柬之傳

姚州本龍朔中武陵主簿。石子仁奏置。其後長史李孝讓。辛文協死於羣蠻。詔遣郎將趙武貴討擊。兵無

噍類。又以將軍李義總繼往。而郎將張惠基戰死。其州遂廢。垂拱中。蠻郎將王善寶。昆州刺史爨乾福。復請置州。言課稅自支。不旁取於蜀。及置州。掾李稜為蠻所殺。延載中。司馬成琛更置瀘南七鎮。戍以蜀兵。蜀始擾矣。且姚府總管五十七州間。皆巨猾游客。案地理志。姚州雲南郡。武德四年。以漢雲南縣地置。與東之所稱不同。志又云。武德四年。以古滇王國民多姚姓。因置姚州都督。并置州十二。曰于州。五陵州。袖州。和往州。舍利州。范鄧州。野共州。洪州。日南州。眉鄧州。登備州。洛諾州。實十三州也。隸姚州都督府。而東之稱姚府總管五十七州。亦不合。舊書高宗紀。麟德元年。於昆明之弄棟川。置姚州都督。與志傳年月又異。

子愿。漪。愿。仕至襄州刺史。漪。著作佐郎。宰相世系表。東之子漪。著作郎。漪子愿。吳郡太守。兼江東採訪使。

姚崇傳

諡曰文獻。案張說撰神道碑云。諡文貞。其諡文獻者。乃崇之父懿也。史誤。

蘇幹傳

父勛。尚南康公主。公主傳。作南昌。

李元紘傳

曾祖絜。左監門大將軍。諡曰明。唐會要。明作胡。

杜暹傳

于闐王尉遲眺約突厥諸國叛暹覺其謀發兵討斬之支黨悉誅更立君長于闐遂安案西域傳于闐國王無名眺者且亦無叛而復安之事

韓皋傳

聞鼓琴至止息歎曰美哉嵇康之爲是曲其當晉魏之際乎王凌母邱儉文欽諸葛誕繼爲揚州都督咸有興復之謀皆爲司馬懿父子所殺康以揚州故廣陵地凌等皆魏大臣故名其曲曰廣陵散言魏散亡自廣陵始案魏之揚州治壽春與廣陵無預皋旣不考而爲此言新舊二史乃采其語入之本傳甚矣史家之無學也王凌刊本皆作王陵亦誤

韓洄傳

終國子祭酒唐會要諡曰成

源乾曜傳

開元八年復爲黃門侍郎同中書門下三品本紀宰相表俱云同中書門下平章事

許景先傳

景先常州義興人曾祖緒武德時以佐命功歷左散騎常侍封真定公遂家洛陽列傳第十三卷附許

世緒事。此避太宗諱。去世字。彼傳云并州人。而此云常州。未知孰是。世緒官左散騎常侍。本傳亦不載。以史例言之。當云曾祖緒。自有傳。

齊澣傳

澣嘗稱陳希烈。宋遙。苗晉卿。韋述之才。後皆大顯。案史家之義。獎忠義而抑姦諛。唐史於齊澣傳云。澣嘗稱陳希烈之才。於魏知古。傳云。薦伊闕尉陳希烈等。後皆有聞于時。於陸餘慶。傳云。薦河南達奚珣等。後皆爲知名士。希烈。珣。唐之大臣。身爲賊相。雖貴顯何足道。而輒津津述之。可謂無識之甚也。

李峴傳

吳王恪孫也。案宗室傳。恪子琨。琨子禕。禕子峴。世系表亦同。則峴乃恪之曾孫。

李回傳

新興王德良六世孫。案宗室傳。稱長樂郡王幼良六世孫。與本傳異。而宗室世系表。以回爲長平郡王叔良六世孫。又與兩傳俱異。考舊史回傳。父名如仙。據世系表。如仙爲長平王五世孫。則回出自叔良之後。審矣。

贈刑部尚書。唐會要。贈司徒。諡文懿。

唐宰相以宗室進者九人。林甫。姦諛。幾亡天下。李程。知柔在位。無所發明。其餘以材稱職。號賢宰相。案

宗室世系表。宰相十一人。此云九人者。知柔以嗣王權知中書事。非真當國。麟亦屬疏。故不數也。林甫姦邪。宗閔植黨。皆爲宗室之恥。其餘才局各殊。要爲稱職。程雖蒙惡諡。而在位能直諫。請選名儒侍講。禁中亦得輔導幼主之誼。新史特立宗室宰相一篇。意以諷當時之不用宗室耳。然舍宗閔而厚責程。吾不知其何說也。程上不當有李字。

劉知幾傳

劉子玄。名知幾。以玄宗諱嫌。故以字行。案列傳名字之下。例書某州縣人。其無可考者。亦於傳首言之。如衛伯玉。宋申錫。高釗。傳云。史失其何所人。鄭薰。傳云。亡鄉里。世系是也。而劉知幾。元結。韓全義。劉栖楚。韋表微。李翱。王璠。裴坦。鄭繁。孫偃。蕭穎士。柳并。皇甫并諸人。傳皆闕之。結傳載自釋一篇。述其族望。鄉里甚備。篇首不書可也。知幾傳敘其撰家。史稱彭城叢亭里諸劉。出楚孝王囂曾孫居巢侯殷云云。篇首不書亦可也。知幾兄知柔。見文苑傳。云徐州彭城人。若全義諸人。鄉里既無可考。當依衛伯玉諸傳之例。方合史法。

蔣乂傳

與許孟容。韋貫之。刪定制敕三十篇。爲開元格。後敕。藝文志。有元和刪定制敕。卽此書。碁者。錡。昆弟。其父若幽。死社稷。李錡。父名國貞。此云若幽者。考舊書肅宗紀。上元二年。殿中監李若幽。賜名國貞。新史失載。賜名一節。此語遂難曉矣。

張獻恭傳

子煦贈太子太保。唐會要贈太子少保。諡曰園。

張獻甫傳

贈司空。唐會要諡曰烈。

牛仙客傳

朕且用康誓。誓當作誓。讀爲辨。隋唐以前俗字。所謂巧言爲辨也。